


元史

卷一百二十九之  
一百三十四

内閣文庫			
番號	漢	1836	
冊數	500 (488)		
函號	別	10	1





元史卷一百二十九

列傳第十六

淺草文庫

皇明翰林學士帝太夫知制誥兼脩國史臣宋 濂

翰林待制兼直學士知制誥兼國史院編脩官臣王 禕等奉勅脩

來阿八赤

來阿八赤寧夏人父木速忽里歸太祖選居宿衛繼命  
掌膳事憲宗即位大舉伐宋攻釣魚山命諸將議進取  
之計木速忽里言於帝曰川蜀之地三分我有其二所  
未附者巴江以下數十州而已地剽勢弱兵糧皆仰給



東南故死守以抗我師蜀地巖險重慶合州又其藩屏  
皆新築之城依險爲固今頓兵堅城之下未見其利曷  
若城二城之間選銳卒五萬命宿將守之與成都舊兵  
相出入不時擾之以牽制其援師然後我師乘新集之  
銳用降人爲鄉導水陸東下破忠涪萬夔諸小郡平其  
城俘其民俟冬水涸瞿唐三峽不日可下出荆楚與鄂  
州渡江諸軍合勢如此則東南之事一舉可定其上流  
重慶合州孤危無援不降卽走矣諸將曰攻城則功在  
頃刻反以其言爲迂卒不用於是博選宿衛中材力可  
任用者以阿八赤奉命往監元帥紐鄰軍遏宋人援兵

駐重慶下流之銅羅峽夾江據二崖爲壘宋都統甘順自  
夔州泝流西上乘舟來攻阿八赤預積薪於二壘明火  
鼓譟矢石如雨順流而進宋人力戰不能支退保西岸  
斂兵自固黎明復至阿八赤身率精兵緣崖而下戰艦  
復進宋人敗走殺傷數千人帝聞而壯之賜銀二錠憲  
宗崩阿八赤從父倍道歸燕世祖卽位問以川蜀之事  
阿八赤歷陳始末誦其父前所言以對世祖撫掌曰當  
時若從此策東南其足平乎朕在鄂渚日望上流之聲  
勢耳至元七年南征襄樊發河南北器械糧儲悉聚于  
淮西之義陽慮宋人剽掠命阿八赤督運二日而畢旣



還世祖大悅以銀一錠賜之十四年立尚膳院授中順大夫同知尚膳院事十八年佩三珠虎符授通奉大夫益都等路宣慰使都元帥發兵萬人開運河阿八赤往來督視寒暑不輟有兩卒自傷其手以示不可用阿八赤檄樞密并行省奏聞斬之以懲不律運河既開遷膠萊海道漕運使二十一年調同僉宣徽院事遼左不寧復降虎符授征東招討使阿八赤招徠降附期以自新遠近帖然二十二年授征東宣慰使都元帥皇子鎮南王征交趾授湖廣等處行中書省右丞召見世祖親解衣衣之并金玉束帶及弓矢甲冑賜焉二十四年改湖

廣等處行尚書省右丞詔四省所發士馬俾阿八赤閱視九月領中衛親軍千人翊導皇子至思明州賊阻險拒守於是選精銳與賊戰于女兒關斬馘萬計餘兵棄關走於是大軍深入進至交州陳日烜空其城而道阿八赤曰賊棄巢穴而匿山海者意待吾之敝而乘之耳將士多北人春夏之交瘴癘作賊弗就擒吾不能持久矣今出兵分定其地招降納附勿縱士卒侵掠急捕日烜此策之善者也時日烜屢遣使約降欲以賂緩我師諸將皆信其說且修城以居而待其至又之軍乏食日烜不降擁衆據竹洞安邦海口阿八赤率兵往攻之屢



與賊遇晝夜迎戰賊兵敗遁會將士多疫不能進而諸蠻復叛所得關峒皆失守乃議班師選諸軍步騎命先啓行且戰且行日數十合賊據高險射毒矢將士裹瘡以戰諸軍護皇子出賊境阿八赤中毒矢三首項股皆腫遂卒子寄僧爲水達達屯田總管府達魯花赤乃顏叛戰于高麗雙城調萬安軍達魯花赤平黎蠻有功遷雷州路總管卒孫完者不花同知潮州路總管府事次禿滿不花也先不花太不花

紐璘也速合兒附

紐璘璘竹帶人祖字羅帶爲太祖宿衛從太宗平金成

河南父太答兒佐憲宗征阿速欽察等國有功拜都元帥歲壬子率陝西西海鞏昌諸軍攻宋入蜀癸丑與總帥汪田哥立利州甲寅攻碉門黎雅等城乙卯入重慶獲都統制張實是歲卒紐璘偉貌長身勇力絕人且多謀略常從父軍中丁巳歲憲宗命將兵萬人略地自利州下白水過大獲山出梁山軍直抵夔門戊午還釣魚山引軍欲會都元帥滑答胡等於成都宋制置使蒲擇之遣安撫劉整都統制段元鑑等率衆據遂寧江箭灘渡以斷東路紐璘軍至不能渡自旦至暮大戰斬首二千七百餘級遂長驅至成都帝聞賜金帛勞之蒲擇之



命楊大淵等守劔門及靈泉山自將四川兵取成都會  
阿荅胡死諸王阿卜干與諸將脫林帶等謀曰今宋兵  
日逼聞我帥死必悉衆來攻其鋒不可當我軍去朝廷  
遠待上命建大帥然後禦敵恐無及已不若攜紐璘爲  
長以號令諸將出彼不意敵可必破衆然之遂推紐璘  
爲長紐璘率諸將大破宋軍于靈泉山乘勝追擒韓勇  
斬之蒲擇之兵潰進圍雲頂山城扼宋軍歸路其主將  
倉卒失計遂以其衆降城中食盡亦殺其守將以降成  
都彭漢懷綿等州悉平威茂諸蕃亦來附紐璘奉金銀  
竹箭銀銷刀遣速哥入獻帝賜黃金五十兩卽軍中

拜都元帥時紐璘軍止二萬以五千命拜延八都魯等  
守成都自將萬五千人從馬湖趨重慶冬帝進軍至大  
獲山紐璘率步騎號五萬戰船二百艘發成都遣張威  
以五百人爲前鋒水陸並進謀鎖重慶江以絕吳蜀之  
路縛橋資州之口以濟師千戶暗都刺率舟師而下紐  
璘將步騎而南旌旗輜重百里不絕鼓譟渡瀘放舟而  
東蒲擇之以兵分道要遮遇輒敗之紐璘至涪造浮橋  
駐軍橋南北以杜宋援兵聞大軍多瘡癘遣人進牛犬  
豕各萬頭明年春朝行在所還討思播二州獲其將一  
人宋將呂文煥攻涪浮橋特新立成都士馬不耐其水



士多病死紐璘憂之密旨督戰不得已出師大敗文煥  
軍獲其將二人斬之遂班師文煥以兵襲其後紐璘戰  
却之中統元年世祖卽位紐璘入朝賜虎符及黃金五  
十兩白金二千五百兩馬二匹紐璘遣梁載立招降黎  
雅瀾門巖州偏林關諸蠻得漢番二萬餘戶未幾詔速  
哥分西川兵及陝西諸軍屬紐璘鎮秦鞏唐兀之地三  
年宋將劉整以瀘州降呂文煥圍之詔以兵往援文煥  
敗走遂徙瀘州民於成都潼川四年爲劉整所譖徵至  
上都驗問無狀詔釋之還至昌平卒子也速答兒  
也速答兒勇智類其父至元十一年入見世祖以屬行

樞密院火都赤使習兵事從圍嘉定以三千人至三  
九頂山相地形勢敗宋安撫咎萬壽兵斬首五百級以  
功賜虎符授六翼達魯花赤咎萬壽尋遣部將李立以  
嘉定三龜九頂紫雲諸城砦降又從行樞密副使忽敦  
率兵徇下流諸城皆望風來附忽敦以兵二萬會東川  
行樞密院合答圍重慶歲餘不下帝命行樞密副使不  
花代將不花將兵萬餘至城下也速答兒率二十餘騎  
攻其門宋都統趙安出戰也速答兒三人其軍再挾猛  
士以出大兵四集斬首五百餘級趙安開門降制置使  
張珪遁追至涪州擒之捷聞帝賜玉帶鈔五千貫授西



川蒙古軍馬六翼新附軍招討使遷四川西道宣慰使  
加都元帥羅氏鬼國亦奚不薛叛詔以四川兵會雲南  
江南兵討之至會靈關亦奚不薛遣先鋒阿麻阿豆等  
將數萬衆迎敵也速答兒馳入其軍挾阿麻阿豆出斬  
之亦奚不薛懼率所部五萬餘戶降以功拜西川等處  
行中書省右丞加賜金帛鞍轡西南夷雄左都掌蠻得  
蘭右叛詔以兵討降之改四川等處行樞密副使冬烏  
蒙蠻陰連都掌蠻以叛詔以兵會雲南行院拜答力進  
討也速答兒擒烏蒙蠻帝賜玉帶織金服遷蒙古軍都  
萬戶復賜銀鼠裘鎮唐兀之地進同知四川等處行樞

密院事仍居鎮成宗卽位拜四川等處行中書省平章  
政事武宗時由四川遷雲南加左丞相仍爲平章政事  
南征叛蠻感瘴毒還至成都平弟八刺襲爲蒙古軍萬  
戶八刺卒次子拜延襲拜四川行省左丞長子南加台  
官至四川行省平章政事

### 阿剌罕

阿剌罕札刺兒氏祖撥徹事太祖爲火而赤又爲博而  
赤攻城掠地數有戰功太宗卽位仍以其職從征隴北  
陝西身先戰士死焉父也柳干幼隸皇子岳里吉爲衛  
士長歲乙未從皇子闊出忽都禿南征累功授萬戶遷



天下馬步禁軍都元帥及大將察罕卒也柳千領其職拜諸翼軍馬都元帥統大軍攻淮東西諸郡戊午戰死揚州阿剌罕襲爲諸翼蒙古軍馬都元帥己未從世祖渡江至鄂而還世祖卽位從至末黎伯顏孛剌宗王阿璽不哥稱兵內向阿剌罕以所部軍擊破阿監帶兒渾都海之兵於昔門禿追至河西以功賜金五十兩中統三年李璫叛據濟南大軍討之阿剌罕與璫戰於老倉口敗之璫伏誅授都元帥賜金虎符銀印四年春改上萬戶從都元帥阿朮伐宋九月師次襄陽西安陽灘逆戰宋兵敗之五年大軍圍襄樊阿剌罕守南面百丈山

漫河灘兵累交宋不能師十年春樊城破襄陽降十一年秋丞相伯顏與阿朮會師襄陽遣阿剌罕率諸翼軍攻郢復諸州十月奪郢州南門堡丞相伯顏阿朮親率騎兵行視漢陽城壁欲取漢口渡江宋人以精兵扼漢口乃遣阿剌罕帥蒙古騎兵倍道兼行擊破沙蕪堡遂入江取鄂州阿剌罕同斷事官楊仁風東略壽昌得米四十萬斛遂統左翼軍順流東下沿江州郡悉降乃撫輯其人民十二年六月加昭毅大將軍蒙古漢軍上萬戶屯駐建康丞相伯顏受詔赴闕以阿剌罕留治省事拜中奉大夫參知政事丞相伯顏還軍中分軍爲三道



並進阿刺罕由西道趨溧水溧陽攻破銀樹東壩至護  
牙山慶豐坊敗宋軍斬首七千級又擒其將祝亮并裨  
校七十二人斬首三千級又與宋兵戰斬首七千級逐  
其援兵退走數十里又敗其都統等三人斬首三千級  
破建平縣殺其守吏進攻廣德軍獨松關先是宋廣德  
守旅濡殺國信使廉希賢嚴忠範等于獨松關及阿刺  
罕軍次安吉州上栢鎮濡率兵來拒戰大敗之斬首二  
千級生擒其副將馮翼戮於軍前濡遁走追斬之十三  
年春宋以國降詔阿刺罕同左丞董文炳率高興等攻  
浙東溫台衢婺處明越及閩中諸郡降其運使提刑等

五百人追襲宋嗣秀王趙與擇至安福縣與擇以軍三  
萬來拒戰阿刺罕身先士卒罕率高興撒里蠻等渡江鏖  
戰四十餘里斬其步帥觀祭使李世達生擒與擇及其  
將吏百八十人悉斬之獲其銅印五軍資器仗無算泉  
州蒲壽庚降江南平以參知政事佩金虎符行江東宣  
慰使十四年入覲進資善大夫行中書省左丞俄遷右  
丞仍宣慰江東十八年召拜光祿大夫中書左丞相行  
中書省事統蒙古軍四十萬征日本行次慶元卒于軍  
中子拜降襲累遷江浙行中書省平章政事仍領本軍  
萬戶拜降卒弟也速迭兒襲由左手蒙古軍萬戶累遷



河南江北行省平章政事兼山東河北蒙古軍大都督

阿塔海

阿塔海遼都思人祖塔海拔都兒驍勇善戰嘗從太祖同飲黑河水以功爲千戶父卜花襲職卒阿塔海魁偉有大度才略過人既襲千戶從大帥兀良合歹征雲南身先行陣師還事世祖于潛邸至元九年命馳驛督諸軍攻襄陽襄陽下第功授鎮國上將軍淮西行樞密院副使築正陽東西城五月霖雨宋將夏貴乘淮水溢來爭正陽阿塔海率衆禦之貴走追至安豐城下而還拜中書右丞行樞密院事渡江與丞相伯顏軍合克池州

十二月師次建康宋鎮江攝守石祖忠遣使乞降揚州守將李庭芝聞之遣兵突圍出擊阿塔海率師救之宋兵望風退走時真泰諸城尚爲宋守鎮江地扼襟喉城壁不固阿塔海乃立木柵以保障居民又分兵屯瓜洲以絕揚州之援宋將張世傑孫虎臣帥舟師陳于江中焦山下其勢甚張阿塔海與平章阿木登南岸督諸軍大破之宋殿帥張彥與平江都統劉師勇襲呂城遣萬戶懷都擊之斬彥十月併行樞密院于行中書省仍以阿塔海爲右丞克常州降平江嘉興十二年正月會兵臨安宋降以其幼主母后入覲詔復趨瓜洲與阿木議



淮南事宜淮南平詳見伯顏阿木傳十四年授祭祿大夫平章政事行中書省事十五年二月召赴闕拜光祿大夫行中書省左丞相移治臨安二十年遷征東行省丞相征日本遇風舟壞喪師十七八二十二年行同知沿江樞密院事二十三年行江西中書省事入朝二十四年扈從征乃顏師還奉朝請居京師二十六年十二月卒年五十六贈推忠翊運宣力功臣開府儀同三司太師上柱國追封順昌郡王諡武敏子阿里麻江淮行樞密副使累官至江南諸道行御史臺御史大夫卒

唆都 伯家奴

唆都扎刺兒氏驍勇善戰入宿衛從征花馬國有功李壇叛山東從諸王哈必赤平之還言于朝曰郡縣惡少年多從間道鬻馬于宋境乞免其罪籍爲兵從之得兵三千人以千人隸唆都爲千戶命守蔡州至元五年阿朮等兵圍襄陽命唆都出巡邏奪宋金剛臺寨笮基窩青澗寨大洪山歸州洞諸隘嘗猝遇宋兵千餘持羈勒欲竊馬唆都戰敗之斬首三百級六年宋將范文虎率舟師駐灌子灘丞相史天澤命唆都拒却之陞總管分東平卒八百隸之九年攻樊城唆都先登城遂破襄陽降再與卒五千賜弓矢襲衣金鞍白金等物入見陞郢



復等處招討使十一年移戍郢州之高港敗宋師斬首  
三百級獲裨校九人從大軍濟江鄂漢降十二年建康  
降參政塔出命唆都入城招集改建康安撫使攻平江  
嘉興皆下之帥舟師會伯顏于臯亭山宋平詔伯顏以  
宋主入朝留參政董文炳守臨安令其自擇可副者文  
炳請留唆都從之時衢婺諸州皆復起兵文炳謂唆都  
曰嚴州不守臨安必危公往鎮之至嚴方十日衢婺徽  
連兵來攻唆都戰却之獲章知府等二十二人復婺州  
敗宋將陳路鈴于梅嶺下斬首三千級又復龍游縣攻  
衢州衢守備甚嚴唆都親率諸軍鼓譟登城拔之宋丞

相留夢炎降攻處州斬首七百級又攻建寧府松溪縣  
懷安縣皆下之十四年陞福建道宣慰使行征南元帥  
府事聽參政塔出節制塔出令唆都取道泉州泛海會  
于廣州之富場將行信州守臣來求援曰元帥不來信  
不可守今邵武方聚兵觀釁元帥旦往邵武兵夕至矣  
唆都告于衆曰若邵武不下則腹背受敵豈獨信不可  
守乎乃遣周萬戶等往招降之唆都趨建寧遇宋兵于  
崇安軍容甚盛令其子百家奴及楊庭壁等數隊夾擊  
之范萬戶以三百人伏祝公橋移刺荅以四百人伏北  
門外庭壁陷墮深入宋兵敗走伏兵起邀擊之斬首千



餘級宋丞相文天祥南劍州都督張清合兵將襲建寧  
凌都夜設伏敗之轉戰至南劍敗張清奪其城至福州  
王積翁以城降攻興化軍知軍陳瓚乞降復閉城拒守  
凌都臨城諭之矢石兩下乃造雲梯砲石攻破其城巷  
戰終日斬首三萬餘級獲瓚支解以徇至漳州漳州亦  
拒守先遣百家奴往會塔出留攻之斬首數千級知府  
何清降攻潮州知府馬發不降凌都恐失富場之期乃  
舍之而去十五年至廣州塔出令還攻潮發城守益備  
凌都塞塹填濠造雲梯鵝車日夜急攻發潛遣人焚之  
二十餘日不能下凌都令于衆曰有能先登者拜爵已

者增秩總管兀良哈耳先登諸將繼之戰至夕宋兵  
潰潮州平進參知政事行省福州徵入見帝以江南旣  
定將有事于海外陞左丞行省泉州招諭南夷諸國十  
八年改右丞行省占城十九年率戰船千艘出廣州浮  
海伐占城占城迎戰兵號二十萬凌都率敢死士擊之  
斬首并溺死者五萬餘人又敗之于大浪潮斬首六萬  
級占城降凌都造木爲城闢田以耕伐烏里越里諸小  
夷皆下之積穀十五萬以給軍二十一年鎮南王脫歡  
征交趾詔凌都帥師來會敗交趾兵于清化府奪義安  
關降其臣彭憲昭顯脫歡命凌都屯天長以就食與大



營相距二百餘里俄有旨班師脫歡引兵還噶都不知也交趾使人告之弗信及至大營則空矣交趾遮之于乾滿江峻都戰死事聞贈榮祿大夫諡襄愍子百家奴百家奴至元五年從元帥阿木攻襄陽築新城數立功七年以質子從郡王合達敗宋兵於灌子灘八年夏四月宋殿帥范文虎等督促糧運輸之襄陽晝夜不絕百家奴乘戰船順流至鹿門山欲塞宋糧道出擊范文虎軍累獲戰功於是河南行省命爲管軍總把後隸丞相伯顏麾下擢爲知印從攻鄂州宋都統趙五帥諸軍來迎戰百家奴深入却敵身被數瘡攻沙洋立雲梯於東角樓登城力戰破之奪其旗幟弓矢衣甲攻新城先登拔之宋將王安撫棄城宵遁伯顏以百家奴前後戰功上聞世祖大悅曰此人之名朕心不忘兵還時大用之朕不食言也今且以良家女及銀椀一賜之以爲左驗從圍漢陽自沙武口曳船入江宋制置夏貴來迎戰百家奴與暗荅孫突入敵陳擊之宋兵奔潰遂登江南岸獲其戰船器甲甚多轉戰至黃州會日暮追擊夏貴至白虎山夜分乃還未幾復攻破金牛埧十二年春正月與千戶薛赤干取雞籠洞還至瑞昌縣遇夏貴潰兵復擊敗之是時宋遣兵救瑞昌未至而縣已下矣復擊宋



救兵得宋所執北兵五人來歸圍江州宋安撫呂師夔以城降東定池州擊宋平章賈似道及孫虎臣于丁家洲追逐百里餘奪戰船五艘及旗幟器甲擒宋統制王文虎因定黃池略地宣州百家奴爲前鋒與敵兵戰喃呢湖敗之奪其戰船三百艘太平州亦望風款附其父峻都因說下建康於是伯顏令謁只里論諸將功遂賞百家奴銀二錠以旌之仍命爲管軍總把俄從伯顏入朝加進義校尉賜銀符爲管軍總把攻丹陽呂城破常州皆有功至蘇州宋守臣王安撫以城降秀州湖州皆不煩兵而下諸軍乘勝直趨臨安宋主出降十三年領

新附軍守鎮江未幾復從平章博魯歡攻秦壽二州中  
蒼遂罷攻後數日與萬戶葉了度將兵攻秦州新城百  
家奴力疾先登破之復被兩瘡已而從阿朮攻下揚州  
諸郡得宋制置李庭芝都統姜才以功陞武略將軍賜  
金符爲管軍總管鎮高郵白馬湖是時行省以百家奴  
襲父峻都郢復州招討使建康宣撫使仍領本翼軍頃  
之徇地福建行定衢婺信等州城邑至新安縣擊斬宋  
趙監軍詹知縣擒江通判道與畬軍遇疾戰敗之鼓行  
而東沈安撫以建寧府降攻陷南劍州張清聶文慶遁  
去閩清懷安二縣傳檄而定至福州諭以威德王安撫



率衆出降攻破興化擒陳安撫及白牒都統別擊東華鄉張世傑軍于泉州俄領諸軍乘戰船入海追逐張世傑于惠州甲子門進至同安縣荅關寨瀕海縣鎮悉招諭下之白望丹王虎陳以戰船三千餘艘來降冬十二月宋二王遣倪宙奉表詣軍門降遂進兵至廣州諸郡縣以次降附明年春正月振旅而還復攻下德勝等寨至蒲仙江聶文慶復敗走攻潮州破之誅馬發等數人廣東遂平三月引宙奉降表來朝未至授昭勇大將軍賜虎符管軍萬戶七月遂朝于上都陞鎮國上將軍海外諸蕃宣慰使兼福建道市舶提舉仍領本翼軍守福

建俄兼福建道長司宣慰使都元帥是時福建多水災百家奴出私錢市米以賑貧民全活者甚衆十七年朝京師加正奉大夫宣慰使都元帥二十二年從父唆都征交趾唆都力戰死之百家奴遂與脫懽引兵薄交趾境水陸轉戰戰輒有功二十五年驛召至南京宣慰司命括五路民馬二十七年除建康路總管武宗即位遷鎮江路總管至大四年金瘡發卒于家

李恒

李恒字德卿其先姓於彌氏唐末賜姓李世爲西夏國主太祖經略河西有守兀納刺城者夏主之子也城陷



不屈而死子惟忠方七歲求從父死主將異之執以獻宗王合撒兒王留養之及嗣王移相哥立惟忠從經略中原有功淄川王分地以惟忠爲達魯花赤佩金符惟忠生恒恒生有異質王妃撫之猶己子中統三年命恒爲尚書斷事官恒以讓其兄李璫反漣海恒從其父棄家入告變璫怒繫恒闔門獄中璫誅得出世祖嘉其功授淄萊路奧魯總管佩金符併償其所失家資至元七年改宣武將軍益都淄萊新軍萬戶從伐宋襄陽守將呂文煥時出拒敵殿帥范文虎復援之恒率本軍築堡萬山扼城西絕其陸路文煥等又以漁舟渡漢水窺伺

軍形恒設伏敗之水路亦絕遂進攻樊城十年春恒以精兵渡漢自南面先登樊城破襄陽亦降捷聞帝賜以寶刀遷明威將軍佩金虎符十一年丞相伯顏大會師襄陽進至郢州宋以舟師截漢水伯顏由唐港入漢捨郢而進攻沙洋新城留恒爲後拒敗其追兵至陽羅堡宋制置夏貴遣其子松來逆戰恒先陷陣額中流矢伯顏止之恒戰益力卒射松殺之諸軍渡江恒與宋兵戰自寅至申夏貴敗走鄂州漢陽俱下以功遷宣威將軍賜白金五百兩遂從伯顏東下十二年春宋將高世傑復窺漢沔乃遣恒還守鄂州時豪民聚衆侵江陵省命



恒往討之恒歛兵不動但諭使出降得生口十餘萬悉  
縱爲民仍禁軍毋得虜掠饋獻充積一無所受十二年  
從右丞阿里海牙至洞庭擒高世傑下岳州進攻沙市  
拔之宋制置高達以江陵降留恒鎮守傳檄歸峽辰沅  
靖澧常德諸州皆下未幾徙鎮常德以扼湖南之衝俄  
有詔分三道出師以恒爲左副都元帥從都元帥遜都  
台出江西九月開府于江州師次建昌縣擒都統熊飛  
遂圍隆興轉運使劉槃請降恒察其詐密爲之備槃果  
以銳兵突至恒擊敗之殺獲殆盡槃乃降下撫瑞建昌  
臨江軍中有得宋相文天祥與建昌故吏民書恒焚之

人心乃安進攻吉州知州周天驥降遂定贛南安廣東  
經略徐直諒奉蠲書納其所部十四郡前江西制置黃  
萬石亦以邵武降隆興帥府誣富民與敵連已誅百三  
十家恒還審其非罪盡釋之宋丞檣隱宜中及其大將  
張世傑立益王昰於閩中郡縣豪傑爭起兵應之恒遣  
將破吳浚兵於南豐世傑遣都統張文虎與浚合兵十  
萬期必復建昌恒復遣將敗之兜港浚走從文天祥於  
瑞金又破之天祥走汀州遣鎮撫孔遵追之併破趙孟  
潛軍取汀州元帥府罷授昭勇大將軍同知江西宣慰  
司事加鎮國上將軍遷福建宣慰使改江西宣慰使天



祥復取汀州兵出興國縣連破諸邑圍贛州尤急或言  
天祥墳墓在吉州者若遣兵發之則必下矣恒曰王師  
討不服耳豈有發人墳墓之理乃分兵援贛自率精兵  
潛至興國天祥走追至空坑獲其妻女擒招討使趙時  
賞已下二十餘人降其衆二十萬有旨令與右丞阿里  
罕左丞董文炳合兵追益王衆議所向皆謂宜趨福建  
恒曰不可若諸軍俱在福建彼必竄廣東則梅嶺江西  
非我有矣宜從廣東夾攻之衆以爲然兵至梅嶺果與  
宋兵遇出其不意敗之乃遁走礪州十四年拜參知政  
事行省江西十五年益王殂其樞密張世傑陸秀夫等

復立衛王昺守廣東諸郡詔以恒爲蒙古漢軍都元帥  
經略之恒進兵取英德府清遠縣敗其制置凌震運使  
王道夫遂入廣州世傑等移屯崖山時都元帥張弘範  
舟師未至恒按兵不動分遣諸將略定梅循諸州凌震  
等復抵廣州恒擊敗之背棄舟走赴水死奪其船三百  
艘擒將吏宋邁以下二百餘人又破其餘軍於菱塘越  
十六年二月弘範至自漳州直指崖山恒率所部赴之  
張世傑集海艦千餘艘貫以巨索爲柵以自固恒遣斷  
其汲路其勢日迫諭降不可乃陣於船尾由北面逆行  
擣其柵索絕世傑猶戰死自朝至晡弘範督南面諸軍



合擊大敗之陸秀夫先沉妻子于海乃抱衛王赴海死  
從死者十餘萬人獲其金璽後宮及文武之臣其大將  
翟國秀凌震等皆解甲降焚溺之餘尚得八百餘艘是  
日黑氣如霧有乘舟南遁者恒以爲衛王追至高化詢  
之降人始知衛王已死遁者乃世傑也世傑繼亦溺死  
於海陵港嶺海悉平功成入覲帝賞勞甚厚將士預賜  
宴者二百餘人十七年拜資善大夫中書左丞行省荆  
湖掠民爲奴婢者禁之常德澧辰沅靖五郡之饑者賑  
之獵戶之籍於官者奏請一千戶之外悉放散之十九  
年乞解軍職乃命其長子同知江西宣慰司事散木解  
襲爲本軍萬戶占城之役恒奉旨給其糧餉器械海艦  
百艘久留瘴鄉冒疾而還俄有詔命恒從皇子鎮南王  
征交趾結筏渡海奪天長府交趾遂空其國航海而遁  
恒封其宮庭府庫追襲於海洋敗之得船二百艘幾獲  
其世子會盛夏軍中疾作霖潦暴漲浸濯營地議者謂  
交趾且降請班師恒弗能奪遂還蠻兵追敗後軍王乃  
改命恒殿後且戰且行毒矢貫恒膝一卒負恒而趨至  
思州毒發卒年五十後贈銀青榮祿大夫平章政事諡  
武愍再贈推忠靖遠功臣太保儀同三司追封滕國公  
子散木解江西行省平章政事囊加真益都淄萊萬戶



遜都台同知湖南宣慰使司事孫薛徹干兵部侍郎薛  
徹禿益都般陽萬戶

元史卷一百三十

列傳第十七

皇明翰林學士雷大夫知制誥兼脩國史臣宋濂

翰林待制奉直郎知制誥兼國史院編修官臣王禕等奉勅脩

徹里

徹里燕只吉台氏曾祖太赤爲馬步軍都元帥從太祖  
定中原以功封徐邳二州因家於徐徹里幼孤母蒲察  
氏教以讀書至元十八年世祖召見應對詳雅悅之俾  
常侍左右民間事時有所咨訪從征東北邊還因言大



軍所過民不勝煩擾寒餓且死宜加賑給帝從之乃賜邊民穀帛牛馬有差賴以存活者衆擢利用監二十三年奉使江南省風俗訪遺逸時行省理財方急責所在學田以價輸官徹里曰學田所以供祭禮育人才也安可鬻遽止之還朝以聞帝嘉納焉二十四年分中書爲尚書省桑哥爲相引用黨與鈞考天下錢糧凡昔權臣阿合馬積年負逋舉以中書失徵奏誅二參政行省乘風督責尤峻主無所償則責及親戚或逮繫隣黨械禁榜掠民不勝其苦自裁及死獄者以百數中外騷動廷臣顧忌皆莫敢言徹里乃於帝前具陳桑哥姦貪誤國

害民狀辭語激烈帝怒謂其毀詆大臣失禮體命左右批其頰徹里辯愈力且曰臣與桑哥無讎所以力數其罪而不顧身者正爲國家計耳苟畏聖怒而不復言則奸臣何由而除民害何由而息且使陛下有拒諫之名臣竊懼焉於是帝大悟卽命帥羽林三百人往籍其家得珍寶如內藏之半桑哥旣誅諸枉繫者始得釋復奉旨往江南籍桑哥姻黨江浙省臣烏馬兒蔑列忻都王濟湖廣省臣要朶木等皆棄市天下大快之徹里往來凡四道徐皆過門不入進拜御史中丞俄陞福建行省平章政事賜黃金五十兩白金五千兩汀漳劇盜歐猗



久不平遂引兵征之號令嚴肅所過秋毫無犯有降者則勞以酒食而慰遣之曰吾意汝豈反者耶良由官吏汙暴所致今既來歸卽爲平民吾安忍罪汝其返汝耕桑安汝田里毋恐他柵聞之悉欵附未幾歐狗爲其黨縛致于軍梟首以徇脅從者不戮一人汀漳平三十一年帝不豫徹里馳還京師侍醫藥帝崩與諸王大臣共定策迎立成宗大德元年拜江南諸道行臺御史大夫一日召都事賈鈞謂曰國家置御史臺所以肅清庶官美風俗興教化也乃者御史不存大體按巡以苛爲明徵賦以多爲功至有迫子證父弟證兄奴許主者傷風

敗教莫茲爲甚君爲我語諸御史毋庸效尤爲也帝曰而善之改江浙行省平章政事江浙稅糧甲天下平江嘉興湖州三郡當江浙什六七而其地極下水鍾爲震澤震澤之注由吳松江入海歲久江淤塞豪民利之封土爲田水道淤塞由是浸淫泛溢敗諸郡禾稼朝廷命行省疏導之發卒數萬人徹里董其役凡四閱月畢工九年召入爲中書平章政事十月以疾薨年四十七薨之日家資不滿二百緡人服其廉贈推忠守正佐理功臣太傅開府儀同三司上柱國追封徐國公諡忠肅至治二年加贈宣忠同德弼亮功臣太師開府儀同三司



上柱國追封武寧王諡正憲子朶兒只江浙行省左丞  
不忽木

不忽木一名時用字用臣世爲康里部大人康里卽漢  
高車國也祖海藍伯嘗事克烈王可汗王可汗滅卽棄  
家從數千騎望西北馳去太祖遣使招之荅曰昔與帝  
同事王可汗今王可汗旣亡不忍改所事遂去莫知所  
之子十人皆爲太祖所虜燕真最幼年方六歲太祖以  
賜莊聖皇后后憐而育之遣侍世祖於藩邸長從征伐  
有功世祖威名日盛憲宗將伐宋命以居守燕真曰主  
上素有疑志今乘輿遠涉危難之地殿下以皇弟獨處

安全可乎世祖然之因請從南征憲宗喜卽分兵命趨  
鄂州而自將攻蜀之釣魚山令阿里不哥居守憲宗崩  
燕真統世祖留部覺阿里不哥有異志奉皇后稍引而  
南與世祖會于上都世祖卽位燕真未及大用而卒官  
止衛率不忽木其仲子也資稟英特進止詳雅世祖奇  
之命給事裕宗東宮師事太子贊善王恂恂從北征乃  
受學于國子祭酒許衡日記數千言衡每稱之以爲有  
公輔器世祖嘗欲觀國子所書字不忽木年十六獨書  
貞觀政要數十事以進帝知其寓規諫意嘉歎久之衡  
纂歷代帝王名諡統系歲年爲書授諸生不忽木讀數



過卽成誦帝召試不遺一字至元十三年與同舍生堅  
童太荅秃魯等上疏曰臣等聞之學記曰君子如欲化  
民成俗其必由學乎王不琢不成器人不學不知道故  
古之王者建國君民教學爲先蓋自堯舜禹湯文武之  
世莫不有學故其治隆於上俗美於下而爲後世所法  
降至漢朝亦建學校詔諸生課試補官魏道武帝起自  
北方既定中原增置生員三千儒學以興此歷代皆有  
學校之證也臣等今復取平南之君建置學校者爲陛  
下陳之晉武帝嘗平吳矣始起國子學隋文帝嘗滅陳  
矣俾國子寺不隸太常唐高祖嘗滅梁矣詔諸州縣及  
鄉並令置學及至太宗數幸國學增築學舍至千二百  
間國學太學四門學亦增生員其書筭各置博士乃至  
高麗百濟新羅高昌吐蕃諸國會長亦遣子弟入學國  
學之內至八千餘人高宗因之遂令國子監領六學一  
曰國子學二曰太學三曰四門學四曰律學五曰書學  
六曰算學各置生徒有差皆承高祖之意也然晉之平  
吳得戶五十二萬而已隋之滅陳得郡縣五百而已唐  
之滅梁得戶六十餘萬而已而其崇重學校已如此況  
我堂堂大國奄有江嶺之地計亡宋之戶不下千萬此  
陛下神功自古未有而非晉隋唐之所敢比也然學校



之政尚未全舉臣竊惜之臣等嚮被聖恩俾習儒學欽  
惟聖意豈不以諸色人仕宦者常多蒙古人仕宦者尚  
少而欲臣等曉識世務以任陛下之使令乎然以學制  
未定朋從數少譬猶責嘉禾於數苗求良驥於數馬臣  
等恐其不易得也爲今之計如欲人材衆多通習漢法  
必如古昔徧立學校然後可若曰未暇宜且於大都弘  
闡國學擇蒙古人年十五以下十歲以上質美者百人  
百官子弟與凡民俊秀者百人俾廩給各有定制選德  
業充備足爲師表者充司業博士助教而教育之使其  
教必本於人倫明乎物理爲之講解經傳授以修身齊  
家治國平天下之道其下復立數科如小學律書算之  
類每科設置教授各令以本業訓導小學科則令讀誦  
經書教以應對進退事長之節律科則專令通曉吏事  
書科則專令曉習字畫算科則專令熟閑算數或一藝  
通然後改授或一日之間更次爲之俾國子學官總領  
其事常加點勘務要俱通仍以義理爲主有餘力者聽  
令學作文字日月歲時隨其利鈍各責所就功課程其  
勤惰而賞罰之勤者則升之上舍惰者則降之下舍待  
其改過則復升之假日則聽令學射自非假日無故不  
令出學數年以後上舍生學業有成就者乃聽學官保



舉蒙古人若何品級諸色人若何仕進其未成就者且令依舊學習俟其可以從政然後歲聽學官舉其賢者能者使之依例入仕其終不可教者三年聽令出學凡學政因革生員增減若得不時奏聞則學無弊政而天下之材亦皆觀感而興起矣然後續立郡縣之學求以化民成俗無不可者臣等愚幼見於書聞於師者如此未敢必其可行伏望聖慈下臣此章令諸老先生與左丞王贊善等商議條奏施行臣等不勝至願書奏帝覽之喜十四年授利用少監十五年出爲燕南河北道提刑按察副使帝遣通事脫虎脫護送西僧往作佛事還過真定筮驛吏幾死訴之按察使不敢問不忽木受其狀以僧下獄脫虎脫直欲出僧辭氣倔強不忽木令去其冠庭下責以不職脫虎脫逃歸以聞帝曰不忽木素剛正必爾輩犯法故也繼而燕南奏至帝曰我固知之十九年陞提刑按察使有訟靜州守臣盜官物者靜州本隸河東特命不忽木往按之歸報稱旨賜曰金千兩鈔五千貫二十一年召參議中書省事時權茶轉運使盧世榮阿附宣政使桑哥言能用已則國賦可十倍於舊帝以問不忽木對曰自昔聚斂之臣如桑弘羊宇文融之徒操利術以惑時君始者莫不謂之忠及其罪稔



惡著國與民俱困雖悔何及臣願陛下無納其說帝不聽以世榮爲右丞不忽木遂辭參議不拜二十二年世榮以罪被誅帝曰朕殊愧卿擢吏部尚書時方籍沒阿合馬家其奴張散札兒等罪當死謬言阿合馬家實隱寄者多如盡得之可資國用途勾考捕繫連及無辜京師騷動帝頗疑之命丞相安童集六部長貳官詢問其事不忽木曰是奴爲阿合馬心腹爪牙死有餘罪爲此言者蓋欲苟延歲月徼幸不死爾豈可復受其誑嫁禍善良耶急誅此徒則怨謗自息丞相以其言人奏帝悟命不忽木鞠之具得其實散札兒等伏誅其捕繫者盡釋之二十三年改工部尚書九月遷刑部河東按察使阿合馬以貲財諂媚權貴貸錢於官約償羊馬至則抑取部民所產以輸事覺遣使按治皆不伏及不忽木往始得其不法百餘事會大同民饑不忽木以便宜發倉廩賑之阿合馬所善幸臣奏不忽木擅發軍儲又鍛鍊阿合馬使自誣服帝曰使行發粟以活吾民乃其職也何罪之有命移其獄至京師審視阿合馬竟伏誅吐土哈求欽察之爲人奴者增益其軍而多取編民中書僉省王遇驗其籍改正之吐土哈遂奏遇有不臣語帝怒欲斬之不忽木諫曰遇始令以欽察之人奴爲兵未聞



以編民也萬一他衛皆倣此戶口耗矣若誅遇後人豈肯爲陛下盡職乎帝意解遇得不死二十四年桑哥奏立尚書省誣殺叅政楊居寬郭佑不忽木爭之不得桑哥深忌之嘗指不忽木謂其妻曰他日籍我家者此人也因其退食責以不坐曹理務欲加之罪遂以疾免車駕還自上都其弟野禮審班侍坐輦中帝曰汝兄必以某日來迎不忽木果以是日至帝見其癯甚問其祿幾何左右對以滿病假者例不給帝念其貧命盡給之二十七年拜翰林學士承旨知制誥兼修國史二十八年春帝獵柳林徹里等劾奏桑哥罪狀帝召問不忽木具

以實對帝大驚乃決意誅之罷尚書省復以六部歸于中書欲用不忽木爲丞相固辭帝曰朕過聽桑哥致天下不安今雖悔之已無及矣朕識卿幼時使卿從學政欲備今日之用勿多讓也不忽木曰朝廷動舊齒爵居臣右者尚多今不次用臣無以服衆帝曰然則孰可對曰太子詹事完澤可嚮者籍沒阿合馬家其賂遺近臣皆有簿籍唯無完澤名又嘗言桑哥爲相必敗國事今果如其言是以知其可也帝曰然非卿無以任吾事乃拜完澤右丞相不忽木平章政事上都留守木八刺沙言改按察司置廉訪司不便宜罷去乃求寃臣賊罪以



動上聽帝以責中丞崔彧或謝病不知不忽木面斥或  
不直言因歷陳不可罷之說帝意乃釋王師征交趾失  
利復謀大舉不忽木曰島夷說詐天威臨之寧不震懼  
獸窮則噬勢使之然今其子曰燭襲位若遣一介之使  
諭以禍福彼能悔過自新則不煩兵而下矣如或不悛  
加兵未晚帝從之於是交趾感懼遣其僞昭明王等詣  
闕謝罪盡獻前六歲所當貢物帝嘉曰卿一言之力也  
卽以其半賜之不忽木辭曰此陛下神武不殺所致臣  
何功焉惟受沉水假山象牙鎮紙水晶筆格而已麥木  
丁請復立尚書省專領右三部不忽木庭責之曰阿舍  
馬桑哥相繼誤國身誅家沒前鑒未遠奈何又欲效之  
乎事遂寢或勸征流求及賦江南包銀皆諫止之桑哥  
黨人納速刺丁等旣誅帝以忻都長於理財欲釋不殺  
不忽木力爭之不從日中凡七奏卒正其罪釋氏請以  
金銀幣帛祠其神帝難之不忽木曰彼佛以去貪爲寶  
遂弗與或言京師蒙古人宜與漢人間處以制不虞不  
忽木曰新民乍遷猶未寧居若復紛更必致失業此蓋  
姦人欲擅貨易之利交結近幸借爲納忠之說耳乃圖  
寫國中貴人第宅已與民居犬牙相制之狀上之而止  
有譖完澤徇私者帝以問不忽木對曰完澤與臣俱待



罪中書設或如所言豈得專行臣等雖愚陋然備位宰  
輔人或發其陰短宜使面質明示責降若內懷猜疑非  
人主至公之道也言者果屈帝怒命左右批其頰而出  
之是日苦寒解所御黑貂裘以賜帝每顧侍臣稱寒唾  
旃之能不忽木從容問其故帝曰彼事憲宗常陰資朕  
財用卿父所知卿時未生誠不知也不忽木曰是所謂  
爲人臣懷二心者今有以內府財物私結親王陛下以  
爲若何帝急揮以手曰卿止朕失言三十年有星孛于  
帝座帝憂之夜召入禁中間所以銷天變之道奏曰風  
雨自天而至人則棟宇以待之江河爲地之限人則舟  
楫以通之天地有所不能者人則爲之此人所以與天  
地參也且父母怒人子不敢疾怨惟起敬起孝故易震  
之象曰君子以恐懼修省詩曰敬天之怒又曰遇災而  
懼三代聖王克謹天戒鮮不有終漢文之世同日山崩  
者二十有九日食地震頻歲有之善用此道天亦悔禍  
海內又安此前代之龜鑑也臣願陛下法之因誦文帝  
日食求言詔帝悚然曰此言深合朕意可復誦之遂詳  
論欵陳衣至四鼓明日進膳帝以盤珍賜之三十年帝  
不豫故事非國人勳舊不得入臥內不忽木以謹厚自  
視醫藥未嘗去左右帝大漸與御史大夫周勃那顏太



傅伯顏並受遺詔留禁中丞相完澤至不得入伺月魯那顏伯顏出問曰我年位俱在不忽木上國有大議而不預何耶伯顏歎息曰使丞相有不忽木識慮何至使吾屬如是之勞哉完澤不能對入言於太后太后居三人問之月魯那顏曰臣受顧命太后但觀臣等爲之臣若誤國卽甘伏誅宗社大事非官中所當預知也太后然其言遂定大策其後發引升耐請諡南郊皆不忽木領之成宗卽位執政皆迎於上都之北丞相常獨入不忽木至數日乃得見帝問知之慰勞之曰卿先朝腹心顧朕寡昧惟朝夕啓沃以匡朕不逮庶無負先帝付託之重也成宗躬攬庶政聽斷明果廷議大事多采不忽木之言太后亦以不忽木先朝舊臣禮貌甚至河東守臣獻嘉禾大臣欲奏以爲瑞不忽木語之曰汝部內所產盡然耶惟此數莖耶曰惟此數莖爾不忽木曰若如此旣無益於民又何足爲瑞遂罷遣之西僧爲佛事請釋罪人所福謂之禿魯麻豪民犯法者皆賄賂之以來免有殺主殺夫者西僧請被以帝后御服乘黃犢出宮門釋之云可得福不忽木曰人倫者王政之本風化之基豈可容其亂法如是帝責丞相曰朕戒汝無使不忽木知今聞其言朕甚愧之使人謂不忽木曰卿且休矣



元史卷一百三十三 列傳 三十一  
朕今從卿言然自是以爲故事有奴告主者主被誅詔  
卽以其主所居宮與之不忽木言若此必大壞天下之  
風俗使人情愈薄無復上下之分矣帝悟爲追廢前命  
執政奏以爲陝西行省平章政事太后謂帝曰不忽木  
朝廷正人先皇帝所付託豈可出之於外耶帝復留之  
竟以與同列多異議稱疾不出元貞二年春召至便殿  
曰朕知卿疾之故以卿不能從人人亦不能從卿也欲  
以段貞代卿如何不忽木曰貞實勝於臣乃拜昭文館  
大學士平章軍國重事註曰是職也國朝惟史天澤嘗  
爲之臣何功敢當此制去重字大德二年御史中丞崔

或卒特命行中丞事三年兼領侍儀司事有因父官受  
賄賂御史必欲歸罪其父不忽木曰風紀之司以宣政  
化勵風俗爲先若使子證父何以興孝樞密臣受人王  
帶徵賦不敘御史言罰太輕不忽木曰禮大臣貪墨惟  
曰簠簋不飾若加笞辱非刑不上大夫之意人稱其平  
恕四年病復作帝遣醫治之不効乃附奏曰臣孱庸無  
取叨承眷渥大限有終永辭昭代引觴滿飲而卒年四  
十六帝聞之驚悼士大夫皆哭失聲木素貧躬自爨汲  
妻織紵以養母後因使還則母已卒號慟嘔血幾不起  
平居服儒素不尚華飾祿賜有餘卽散施親舊明於知



人多所薦拔丞相哈刺哈孫答剌罕亦其所薦也其學先躬行而後文藝居則簡默及帝前論事吐辭洪暢引義正大以天下之重自任知無不言世祖嘗語之曰太祖有言人主理天下如右手持物必資左手承之然後能固卿實朕之左手也每侍燕閒必陳說古今治要世祖每拊髀歎曰恨卿生晚不得早聞此言然亦吾子孫之福臨崩以白璧遺之曰他日持此以見朕也武宗時贈純誠佐理功臣太傅開府儀同三司上柱國魯國公諡文貞子回回陝西行省平章政事夔夔由江浙行省平章政事入爲翰林學士承旨

完澤

完澤土別燕氏祖土薛從太祖起朔方平諸部太宗伐金命太弟睿宗由陝右進師以擊其不備土薛爲先鋒遂去武休關越漢江略方城而北破金兵于陽翟金亡從攻興元開利諸州拜都元帥取宋成都斬其將陳隆之賜食邑六百戶父線真宿衛禁中掌御膳中統初從世祖北征四年拜中書丞相與諸儒臣論定朝制完澤以大臣子選爲裕宗王府僚屬裕宗爲皇太子署詹事長入參謀議出掌環衛小心慎密太子甚器重之一日會燕宗室指完澤語衆曰親善遠惡君之急務善人如



完澤者羣臣中豈易得哉自是常典東宮衛兵裕宗薨成宗以皇孫撫軍北方完澤兩從入北至元二十八年桑哥伏誅世祖咨問廷臣特拜中書右丞相完澤入相革桑哥弊政請自中統初積歲逋負之錢粟悉蠲免之民賴其惠三十一年世祖崩完澤受遺詔合宗戚大臣之議啓皇太后迎成宗卽位詔諭中外罷征安南之師建議加上祖宗尊諡廟號致養皇太后示天下爲人子之禮元貞以來朝廷恪守成憲詔書屢下散財發粟不惜鉅萬以頒賜百姓當時以賢相稱之大德四年加太傅錄軍國重事位望益崇成宗倚任之意益重而能處之以安靜不急於功利故吏民守職樂業世稱賢相云七年薨年五十八追封興元王諡忠憲

### 阿魯渾薩理

阿魯渾薩理畏兀人祖阿台薩理當太祖定西域還時因從至燕會畏兀國王亦都護請于朝盡歸其民詔許之遂復西還精佛氏學生乞台薩理襲先業通經律論業旣成師名之曰萬全至元十二年入爲釋教都總統拜正議大夫同知總制院事加資德大夫統制使年七十卒子三人長曰畏吾兒薩理累官資德大夫中書右丞行泉府太卿季曰烏瓦赤薩理阿魯渾薩理其中子



也。以父字爲全氏。幼聰慧。受業於國師八哈思巴。旣通其學。且解諸國語。世祖聞其材。俾習中國之學。於是經史百家及陰陽曆數圖緯方技之說。皆通習之。後事裕宗。入宿衛。深見器重。至元二十年。有西域僧自言能知天象譯者。皆莫能通其說。帝問左右誰可使者。侍臣脫烈對曰。阿魯渾薩理可。卽召與論。難僧大屈服。帝悅。令宿衛內朝。會有江南人言宋宗室反者。命遣使捕。至闕下。使已發。阿魯渾薩理趣入諫曰。言者必妄。使不可遣。帝曰。卿何以言之。對曰。若果反。郡縣何以不知。言者不。由郡縣而言之。闕庭必其仇也。且江南初定。民疑未附。一旦以小民浮言。輒捕之。恐人人自危。徒中言者之計。帝悟。立召使者還。俾械繫言者。下郡治之。言者立伏。果以嘗貸錢不從。誣之。帝曰。非卿言。幾誤。但恨用卿晚耳。自是命日侍左右。二十一年。擢朝列大夫。左侍儀。奉御。遂勸帝治天下。必用儒術。宜招致山澤道藝之士。以備任使。帝嘉納之。遣使求賢。置集賢館。以待之。秋九月。命領館事。阿魯渾薩理曰。陛下初置集賢。以待士。宜擇重望大臣領之。以新觀聽。請以司徒撒里蠻領其事。帝從之。仍以阿魯渾薩理爲中順大夫。集賢館學士。兼太史院事。仍兼左侍儀。奉御。士之應詔者。盡命館。穀之。凡飲



食供帳車服之盛皆喜過望其弗稱旨者亦請加資而遣之有官於宣徽者欲陰敗其事故盛陳所給廩餼於內前冀帝見之帝果過而問焉對曰此一士之日給也帝怒曰汝欲使朕見而損之乎十倍此以待天下士猶恐不至况欲損之誰肯至者阿魯渾薩理又言於帝曰國學人材之本立國子監置博士弟子員宜優其廩餼使學者日盛從之二十二年夏六月遷嘉議大夫二十三年進集賢大學士中奉大夫二十四年春立尚書省桑哥用事詔阿魯渾薩理與同視事固辭不許授資德大夫尚書右丞繼拜榮祿大夫平章政事桑哥爲政暴橫且進其黨與阿魯渾薩理數切諍之久與乖刺惟以廉正自持桑哥奏立徵利司理天下逋欠使者相望於道所在囹圄皆滿道路側目無敢言者會地震北京阿魯渾薩理請罷徵利司以塞天變詔下之日百姓皆慶未幾桑哥敗以連坐亦籍其產帝問桑哥爲政如此卿何故無一言對曰臣未嘗不言顧言不用耳陛下方信任桑哥甚彼所忌獨臣臣數言不行若抱柴救火祇益其暴不若彌縫其間使無傷國家大本陛下必自悟也帝亦以爲然且曰吾甚愧卿桑哥臨刑吏猶以阿魯渾薩理爲問桑哥曰我惟不用其言故致於敗彼何與



元史卷一百三十一 列傳 十七  
焉帝益信其無罪詔還所籍財產仍遣張九思賜以金帛辭不受二十八年秋乞罷政事并免太史院使詔以爲集賢大學士司天劉監丞言阿魯渾薩理在太史院時數言國家災祥事大不敬請下吏治帝大怒以爲誹謗大臣當抵罪阿魯渾薩理頓首謝曰臣不佞賴陛下天地含容之德雖萬死莫報然欲致言者罪臣恐自是無爲陛下言事者力爭之乃得釋帝曰卿真長者後雖罷政或通夕召入論事知無不言三十年復領太史院事明年帝崩成宗在邊裕宗太后命爲書趣成宗入正大位又命率翰林集賢禮官備禮冊命明年春加守司徒集賢院使領太史院事初裕宗卽世世祖欲定皇太子未知所立以問阿魯渾薩理卽以成宗爲對且言成宗仁孝恭儉宜立於是大計乃決成宗及裕宗皇后皆莫之知也數召阿魯渾薩理不往成宗撫軍北邊帝遣阿魯渾薩理奉皇太子寶于成宗乃一至其邸及卽位語阿魯渾薩理曰朕在潛邸誰不願事朕者惟卿雖召不至今乃知卿真得大臣體自是召對不名賜坐視諸侯王等嘗語左右曰若全平章者真全材也於今殆無其比大德三年復拜中書平章政事十一年薨年六十三有二三延祐四年贈推忠佐理翊亮功臣大師開府儀同



元史卷一百三十一 列傳 九  
三司上柱國追封趙國公諡文定子三人長岳柱次久  
著終翰林侍讀學士次買住蚤卒岳柱自有傳阿台薩  
理贈保德功臣銀青榮祿大夫司徒柱國追封趙國公  
諡端愿乞台薩理累贈純誠守正功臣太保儀同三司  
上柱國追封趙國公諡通敏

岳柱字止所一字兼山自幼容止端嚴性穎悟有遠議  
方八歲觀畫師何澄畫陶母剪髮圖岳柱指陶母手中  
金釧詰之曰金釧可易酒何用剪髮爲也何大驚卽異  
之旣長就學日記千言年十八從丞相荅失蠻備宿衛  
出入禁中如老成人至大元年授集賢學士階政議大

夫卽以薦賢舉能爲事皇慶元年陞中奉大夫湖廣道  
宣慰使日接見儒生詢求民瘼延祐三年進資善大夫  
隆禧院使七年授太史院使英宗視其進止整暇顧謂  
叅政速速曰全院使真故家令子也泰定元年改太常  
禮儀院使四年授禮部尚書領會同館事俄授江西等  
處行中書省叅知政事天曆元年進榮祿大夫集賢大  
學士至順二年除江西等處行中書省平章政事時有  
誣告富民負永寧王宮帑錢八百餘錠者中書遣使諸  
路徵之使至江西岳柱曰事涉誣罔不可奉命僚佐重  
違宰臣意岳柱曰民惟邦本傷本以斂怨亦非宰相福



也令使者以此意復命時燕帖木兒爲丞相聞其言感  
悟命刑部詰治得誣罔狀罪誣告者若干人宰相以奏  
帝嘉之特賜幣帛及上尊酒桂陽州民張思進等嘯聚  
二千餘衆州縣不能治廣東宣慰司請發兵捕之岳柱  
曰有司不能撫綏邊民乃欲僥倖興兵以爲民害耶不  
可宰執皆失色憲司亦以興兵不便爲言岳柱終持不  
可遣千戶王英往問狀英直抵賊巢諭以禍福賊曰致  
我爲非者兩巡檢司耳我等何敢有異心哉諭其衆皆  
使復業 方以寧三年遷河南江北等處行中書省平  
政事旋以軍事至揚州得疾明年十二月端坐而卒

年五十三岳柱天資孝友母弟久住早卒喪之盡哀尤  
嗜經史自天文醫藥之書無不究極度量弘擴有欺之  
者恬不爲意或問之則曰彼自欺也我何與焉母部氏  
亦常稱之曰吾子古人也子四人長普達同僉行宣政  
院事次安僧爲父住後章佩監丞次仁壽中憲大夫長  
秋寺卿

元宋卷一百三十終



元史卷一百三十一

元史卷一百三十一 列傳第十八

皇明翰學士亞中大夫知制誥兼脩國史 臣宋 濂

翰林待制承直郎知制誥兼國史院編脩官 臣 王 禕等奉 勅脩

速哥

速哥蒙古人父忽魯忽兒國王木華黎麾下卒也後夏  
諫塔海帖哥軍以善馳馬有口辯慎重不泄令佩銀符  
常居軍中奏白機務往返未嘗失期太宗以為才賜名  
動哥居詔動哥居奏事朝至朝入奏夕至夕入奏嘗出

康熙十五年重修

元史卷一百三十一

列傳



金盤龍袍及宮女賜之憲宗時以疾卒速哥亦以壯勇  
居軍中歲甲寅憲宗命從都元帥帖哥火魯赤等人蜀  
乙卯萬戶劉七哥阿刺魯阿力與宋兵戰巴州失利陷  
敵中速哥馳入其軍奪劉七哥等以歸以功賜白金五  
十兩馬二疋紫羅圈甲一注又從都元帥紐璘敗宋將  
劉整破雲頂山城紐璘受詔會涪州至馬湖江速哥以  
革為舟夜渡江至大獲山行在所陳道梗失期帝慰遣  
之未幾復自涪州入奏事遇宋軍於三曹山速哥衆僅  
百餘奮兵疾戰敗之奪其器械旗鼓以歸己未宋兵攻  
涪州浮橋部將火尼赤戰陷速哥破圍出之又以白事  
諸王穆哥所復敗宋軍於三曹山還至石羊與劉整遇  
復擊敗之世祖卽位賜白金弓刀鞍勒中統二年賜銀  
符命隸紐璘軍至元二年四川行省遣速哥招收降民  
得三千餘人三年從行院帖赤戰九頂山四年行省也  
速帶兒署為本軍總管從征瀘州五年立德州  
以速哥為達魯花赤擢陝西五路四川行省左右司員  
外郎從也速帶兒入朝賞賚加厚七年從也速帶兒敗  
宋軍于馬湖江用平章政事賽典赤薦遷行尚書省員  
外郎九年建都蠻叛詔諸王奧魯赤及也速帶兒討之  
速哥將千人為先鋒破黎州木尾砦攻連雲關克之軍



至建都戰於東山斬其酋布庫復與元帥八兒剌迎合  
刺軍于不魯思河所過城邑皆下十年討碉樓諸蠻襲  
破連環城還敗宋軍于七盤山辟新軍萬戶十一年賜  
虎符真授管軍萬戶領成都高哇哥等六翼及京兆新  
軍教習水戰也速帶兒進圍嘉定速哥率舟師會平康  
城修築懷遠等砦守其要害十二年遣兵敗宋將咎萬  
壽於麻平旣而行樞密副使忽敦等軍至與也速帶兒  
會於紅崖遣速哥守龍垠城中大震宋將陳都統鮮于  
團練率舟師遁速哥追擊溺死者不可勝計遂與中使  
沈荅罕徇下流諸城紫雲瀘敘皆降進圍重慶速哥以  
所部兵鎮白水馬湖江口十三年帝遣脫朮教化的特  
詔諭其守臣使降不聽乃分兵爲五道水陸並進攻之  
衆軍不利唯速哥獲戰艦三百艘俘其衆百三十人涪  
州守將遣書納降速哥率千人往察其情僞速哥至涪  
州果降遂入其城重慶守臣張萬率衆來襲速哥一日  
夜出兵凡與十八戰斬首三百餘級萬敗走未幾萬復  
以積兵三千人來攻又戰敗之十四年行院辟爲鎮守  
萬戶嘉定總管府達魯花赤時瀘州復叛速哥從大軍  
討平之重慶受圍久其守將趙安開門出降制置使張  
珏遁速哥追破之虜百餘人及其舟二十餘艘以功授



成都水軍萬戶尋改重慶夔府等路宣撫招討兩司軍民達魯花赤十六年除四川南道宣慰使依前成都水軍萬戶鎮重慶夔施黔忠萬雲涪瀘等州十九年亦奚不薛蠻叛置順元等路軍民宣慰司以速哥爲宣慰使經理諸蠻二十四年遷河東陝西等路萬戶府達魯花赤播州宣撫賽因不花等赴闕請留之降八番金竹百餘等砦得戶三萬四千悉以其地爲郡縣置順元路金竹府貴州以統之東連九溪十八峒南至交趾西至雲南咸受節制二十九年入朝加都元帥改河東陝西等處萬戶府達魯花赤三十一年僉書四川行樞密院事

詔開土番道士番叛以兵圍茂州速哥率師敗之元貞元年行院罷速哥家居數歲卒子壽不赤襲河東陝西等處萬戶府達魯花赤

### 囊加歹

囊加歹乃蠻人曾祖不蘭伯仕其國位群臣之右祖合折兒管帳前軍兼統國政仕至太師太祖平乃蠻父麻察來歸太祖命與察刺同總管蒙古漢軍由是從世祖伐宋破阿里不哥於失門禿從諸王哈必赤及闊闊歹平李壇皆有功賞賚甚厚賜金符後以子貴贈太傅追封梁國公諡桓武囊加歹幼從麻察習戰陳有謀畧佩



金符爲都元帥府經歷從阿朮圍襄陽襄陽降以功授漢陽千戶從丞相伯顏攻復州與宋人戰敗宋兵于風波湖渡江後伯顏南攻鄂州阿朮北攻漢陽分戰艦五十囊加歹與張弘範等焚其蒙衝三千艘兩城大恐皆出降伯顏軍次安慶賈似道督師江上遣宋京來請和軍至池州遣囊加歹偕宋京報似道似道復遣阮思聰偕囊加歹至軍中仍請議和時暑雨方漲世祖慮士卒不習水土遣使令緩師伯顏阿朮與諸將議乘勢徑前遂進軍至丁家洲似道師潰大軍次建康帝聞囊加歹親與賈似道語召赴闕具陳其說遣還諭旨於伯顏以

北邊未靖勿輕入敵境而大軍已入平江矣宋使柳岳夏士林呂師孟劉岳等踵至皆命囊加歹同往報之師逼臨安復遣囊加歹入取降表玉璽徵宋將相文武百官出迎王師宋主乃遣賈餘慶等同囊加歹以降表玉璽至臯亭山伯顏遣囊加歹馳獻世祖還傳密旨遷宋君臣北上賜金符授懷遠大將軍安撫司達魯花赤與阿剌罕董文炳等取台温福州尋領蒙古軍副都萬戶江東道宣慰使佩金虎符如故擢江東道按察使復爲本道宣慰使領萬戶如故召爲都元帥管領通事軍馬東征日本未至而還詔以元管出役軍與孛羅迷兒見



管軍合爲一翼充萬戶守建康改賜三珠虎符拜雲南  
行省參知政事討金齒緬國得疾召還京師授南京等  
路宣慰使改河南道宣慰使特旨命襲父職爲蒙古軍  
都萬戶武宗在潛邸囊加歹嘗從北征與海都戰于帖  
堅古明日又戰海都圍之山上囊加歹力戰決圍而出  
與大軍會武宗還師囊加歹殿海都遮道不得過囊加  
歹選勇敢千人直前衝之海都披靡國兵乃由旭哥耳  
溫稱海與晉王軍合是役也囊加歹戰爲多以疾而歸  
成宗崩昭聖元獻太后與仁宗在懷州太后召囊加歹  
不憐吉歹脫因不花八思台等諭之曰今宮車晏駕皇

后欲立安西王阿難荅爾等當毋忘世祖裕宗在天之  
靈盡力奉二皇子囊加歹頓首曰臣等雖碎身不能仰  
報兩朝之恩願効死力旣至京師仁宗遣囊加歹與八  
思台詣諸王秃剌議事宜時內外洶洶猶豫莫敢言囊  
加歹獨贊秃剌定計先發歸白仁宗意猶遲疑固問可  
否對曰事貴速成後將受制於人矣太后與仁宗意乃  
決內難旣平仁宗監國命同知樞密院事武宗卽位真  
拜同知樞密事階資德大夫賜以七寶束帶鞍轡衣甲  
弓矢黃金五十兩以旌其定策之功尋授開縣萬戶府  
達魯花赤仍同知樞密院事仁宗嘗語近臣曰今春之



事吾與太后疑不能主賴囊加歹一語而定吾聞周文  
王有姜太公囊加歹亦予家姜太公也其見稱許如此  
尋以老病乞骸骨不允仁宗卽位以其家河南特授河  
南江北行省平章政事佩金虎符終其身封浚都王子  
教化山東河北蒙古軍副都萬戶執禮和台河南江北  
行省平章政事孫脫堅山東河北軍大都督世襲有位  
忙兀台

忙兀台蒙古達達兒氏祖塔思火兒赤從太宗定中原  
有功爲東平路達魯花赤位在嚴實上忙兀台事世祖  
爲博州路奧魯總管至元七年又爲監戰萬戶佩金虎  
符八年改鄧州新軍蒙古萬戶治水軍于萬山南岸九  
月以兵攻樊拔古城繼敗宋軍于安陽灘轉戰八十里  
禽其將鄭高十月大軍攻樊分軍爲五道忙兀台當其  
一率五翼軍以進焚南岸舟堅雲梯于北岸登櫃子城  
奪西南角入城命部將據倉粟功在諸將右賞金百兩  
襄陽降同宋安撫呂文煥入覲賜銀五十兩及翎根甲  
等物十一年從丞相伯顏平章阿木南征命與萬戶史  
格率麾下會鹽山嶺遇宋兵忙兀台突陣殺一人諸軍  
繼進與戰敗之自郢州黃家原盪舟入湖至沙洋堡立  
砲座十有二豎雲梯先登焚其樓櫓拔羊角埧破沙洋



堡擒宋將四人直抵新城鏖戰自晨至晡大敗之宋復  
州守將翟貴以城降將由漢口入江至蔡店聞宋兵屯  
漢口乃率舟師經鬪龍口至沙步入江遇宋兵三百餘  
艘分道來拒進擊走之次武磯堡宋將夏貴堅守不下  
十月乙卯平章阿朮率萬戶晏徹兒史格賈文備同忙  
兀台四軍雪夜泝流西上黎明至青山磯北岸萬戶史  
格先渡宋將程鵬飛拒敵格被三創喪卒二百人諸將  
繼進大戰中流鵬飛被七創敗走舟泊中洲宋兵阻水  
不得近伯顏復遣萬戶張榮實等率舟來援夏貴率麾  
下數千將奔大軍乘之大敗走黃州遂拔武磯堡斬守

將王達阿朮既渡南岸翼日丞相伯顏視師則大江南  
北皆北軍旗幟宋制置使朱禩孫遁還江陵語在阿朮  
傳已未伯顏次鄂州遣忙兀台諭宋守臣張晏然以城  
降程鵬飛以本軍降知漢陽軍王儀知德安府來興國  
繼降乃留軍鎮鄂漢率諸將水陸東下十二年正月忙  
兀台諭斬黃安慶池州諸郡皆下之次丁家洲宋賈似  
道孫虎臣來拒忙兀台擊之奪虎臣所乘巨舟與宋降  
將范文虎以兵五百諭降和州及無爲鎮巢二軍九月  
攻常州拔其木城宋降將趙潛叛於溧陽伯顏命忙兀  
台擊之戰於豐登莊斬首五百餘級擒其將三人復招



降湖州守將二人十二月行省第其功承制授行兩浙大都督府事十四年改閩廣大都督行都元帥府事時宋二王逃遁入海忙兀台奉旨率諸軍與江西右丞塔出會兵收之次漳州諭降宋守將何清十五年師還福州拜叅知政事詔與唆都等行省于福鎮撫瀕海八郡十月召赴闕陞左丞十六年七月沙縣盜起詔忙兀台復行省事討平之初忙兀台北還左丞唆都行省福建一日帝命召唆都李庭言若召唆都則行省無人宜令建康阿剌罕往帝曰何必阿剌罕其命忙兀台卽往候唆都還則令移潭州可也未幾中書言唆都在福建屬下擾民致南劔等路往往殺長吏叛及忙兀台至招來七十二寨建寧漳汀稍獲安集若移之他處而唆都復往恐重勞民有旨忙兀台仍鎮閩十八年轉右丞時宣慰使王剛中以土人饒貲頗擅作威福忙兀台慮其有變奏移之他道二十一年拜江淮行省平章政事初宋降將五虎陳義嘗助張弘範擒史天祥助完者都討陳大舉又資阿塔海征日本戰艦三千艘福建省臣言其有反側意請除之帝使忙兀台察之至是忙兀台携義入朝保其無事且乞寵以官爵丞相伯顏亦以爲言乃授義同知廣東道宣慰司事授明珠虎符其從林雄等



十人並上百戶二十二年脫忽思樂實傳旨中書省令  
悉代江浙省臣中書復奏帝曰朕安得此言傳者妄也  
如忙兀台之通曉政事亦可代耶俄以言者召赴闕封  
其家貲遣使按驗無狀未幾拜銀青榮祿大夫行省左  
丞相還鎮江浙時浙西大饑乃弛河泊禁發府庫官貨  
低其直買粟以賑之浙東盜起蠲田租以紓民力二十  
三年奏以販鬻私鹽者皆海島民今征日本可募爲水  
工從之賜鈔五千貫役旣罷請以戰艦付海漕又言省  
治在杭州其兩淮江東財賦軍實旣南輸至杭復自杭  
北輸京城往返勞頓不便請移省治于揚州復言淮東

近地宜置屯田歲入糧以給軍所餘餉京師帝悉從其  
言二十五年詔江淮管內並聽忙兀台節制二十六年  
朝廷以中原民轉徙江南令有司遣還忙兀台言其不  
可遂止聞越盜起詔與不魯迷失海牙等合兵討之御  
史大夫王速帖木兒奏宜選將帝曰忙兀台已往無慮  
也未幾悉平之屢以病上疏乞骸骨乃召還二十七年  
以江西平章與魯赤不稱職特命爲丞相兼樞密院事  
出鎮江西謹約束鋤強暴尊卑殊服軍民安業威德並  
著在官四十日卒忙兀台之在江浙專復自用又易置  
戍兵平章不憐吉台言其變更伯顏阿木成法帝每戒



救之既死臺臣劾郎中張斯立罪狀而忙兀台追死劉  
宣及其屯田無成事始聞于帝云子三人帖木兒不花  
字蘭奚襲萬戶亦刺出中書叅知政事

### 與魯赤

與魯赤札刺台人曾祖豁火察驍果善騎射太祖出征  
每提精兵爲前驅祖朔魯罕有膽力嘗被讒不許入見  
一日俟駕出趨前曰臣無罪若果有罪速殺臣臣將從  
先帝於地下不然赦臣願得自効帝笑而復用之辛未  
與金人戰于野孤嶺中流矢戰愈力克之既還拔矢血  
出昏眩帝親撫視傅以藥音不起帝悲悼曰朔魯罕朕

之一臂今亡矣賜其家馬四百匹錦綺萬段父忒木台  
從太宗征杭里部俘部長以獻復從征西夏有功特命  
行省事領兀魯忙兀亦怯烈弘吉刺札刺兒五部軍平  
河南以功賜戶二千嘗駐兵太原平陽河南土人德之  
皆爲立祠與魯赤性朴魯智勇過人早事憲宗帶御器  
械特見親任戊午扈駕征蜀攻釣魚山至元五年攻襄  
陽授金符蒙古軍萬戶明年賜虎符襲父職領蒙古軍  
四萬戶十一年春詔丞相伯顏大舉伐宋以所部從渡  
江圍鄂宋兵固守與魯赤白丞相可遣使諭降乃遣許  
千戶同所獲宋將持金符抵其城東南門懸金符以招



之其夜守門將崔立啓門出遂引立見丞相復遣入城諭守臣張晏然明日晏然以城降遷奧魯赤昭毅大將軍諸郡望風而靡分兵出獨松關宋兵堅守奧魯赤令將校益樹旗幟於山上率精騎突之守兵驚潰棄關走追逐百餘里斬馘不可勝計十三年宋主降分討未下州郡詔加鎮國上將軍行中書省叅知政事未幾以叅知政事行湖北道宣慰使兼領蒙古軍時州郡初附戊以重兵民驚懼往往逃匿山澤間奧魯赤止侵暴恤單弱號令嚴明民悉復業會詔所在括逃俘有司拘男女千餘人時軍士已還部所括者無所歸衆議悉以隸官

奧魯赤曰斯民不幸被兵幸而骨肉完聚復羈之是重被兵也不若籍之爲民衆從之俄徵詣闕賜賚優渥及還帝曰武昌襟帶江湖實要害地朕嘗用師于彼故遣卿往治爲朕耳目陞驃騎衛上將軍中書左丞行宣慰使十八年詔移行省于鄂宣慰司于潭時湖南劇賊周龍張虎聚黨行劫隨宜招捕梟二賊首餘悉縱遣復召入見拜行省右丞改荆湖等處行樞密院副使二十三年春拜湖廣等處行中書省平章政事夏四月赴召上都命佐鎮南王征交趾帝慰諭之曰昔木華黎等戮力王室榮名迄今不朽卿能勉之豈不並美于前人乎仍



命其子脫桓不花襲萬戶至交趾啓王分軍爲三因險  
制變蠻不能支竄匿海島餘寇扼師歸路與魯赤轉戰  
以出改江西行省平章政事二十六年以疾求退不允  
俄授同知湖廣等處行樞密院事成宗卽位進光祿大  
夫上柱國江西等處行中書省平章政事大德元年春  
三月卒年六十六贈金紫光祿大夫大司徒上柱國追  
封鄭國公諡忠宣子拜住明威將軍蒙古侍衛親軍副  
都指揮使脫桓不花驃騎衛上將軍行中書省左丞蒙  
古軍都萬戶

完者都

完者都欽察人父哈刺火者從憲宗征討有功完者都  
廣穎豐領髯長過腹爲人驍勇而樂善好施聽讀史書  
聞忠良則喜遇姦諛則怒歲丙辰以材武從軍已未從  
攻鄂州先登賞銀五十兩中統三年從諸王合必赤討  
李壇于濟南凡兩戰皆有功至元元年合必赤因樞密  
臣以其武勇聞帝特賞賜之四年十月從萬戶木花里  
略地荆南還至襄陽西安陽灘遇宋軍敗之旣而從丞  
相阿朮圍襄樊水陸大戰者四皆有功嘗梯樊城焚樓  
櫓勇敢出諸軍右幕府上其功十一年授武畧將軍爲  
彰德南京新軍千戶九月從丞相伯顏南征十一月攻



沙洋新城始授金符領丞相帳前合必赤軍十二月統  
舟師由沙蕪口渡江十二年春與宋將孫虎臣戰于丁  
家洲大捷進武義將軍攻泰州戰揚子橋戰焦山破常  
州十三年春入臨安下揚州皆有功江南平入見帝顧  
謂侍臣曰真壯士也因賜名拔都兒授信武將軍管軍  
總管高郵軍達魯花赤佩虎符既而軍升爲路遂進懷  
遠大將軍高郵路總管府達魯花赤十六年授昭勇大  
將軍遷管軍萬戶漳州陳吊眼聚黨數萬劫掠汀漳諸  
路七年未平十七年八月樞密副使孛羅請命完者都  
往討從之加鎮國上將軍福建等處征蠻都元帥率兵  
五千以往賜翎根甲面慰遣之且曰賊苟就擒聽汝施  
行時黃華聚黨三萬人擾建寧號頭陀軍完者都先引  
兵鼓行壓其境軍聲大震賊驚懼納欵完者都許以爲  
副元帥凡征蠻之事一以問之且慮其姦詐莫測因大  
獵以耀武適有一鵬翔空完者都仰射之應弦而落遂  
大獵所獲山積華大悅服乃聞于朝請與之俱討賊朝  
廷從之制授華征蠻副元帥與完者都同署華遂爲前  
驅至賊所破其五寨十九年三月追陳吊眼至于壁嶺  
擒之斬首漳州市餘黨悉平軍還至揚州奉旨賞賜有  
差至高郵病七月入覲帝嘉之賜鈔及銀金綺鞍勒弓



矢復授管軍萬戶高郵路總管府達魯花赤有虎爲害  
完者都拔弓矢出郊射殺之二十二年八月以疾召入  
朝帝屢遣中使存問仍命良醫視之疾平帝大喜賜醫  
者鈔萬貫拜完者都驃騎上將軍江浙行省左丞兼管  
軍萬戶初浙西私鹽吏莫能禁完者都躬詣松江上海  
收鹽徒五千隸軍籍九月授中書左丞行浙西道宣慰  
使二十五年遙授尚書省左丞二十六年陞資德大夫  
江西等處行樞密院副使兼廣東宣慰使疾復作召還  
成宗卽位入見賜玉帶授榮祿大夫江浙行省平章政  
事大德二年十一月卒年五十九贈劾忠宣力定遠功

臣開府儀同三司太尉上柱國追封林國公諡武宣子  
十四人皆仕而帖木秃古思別里怯都尤顯孫二十四  
人仕者亦多云

伯帖木兒

伯帖木兒欽察人也至元中充哈刺赤入備宿衛以忠  
謹授武節將軍僉左衛親軍都指揮使司事二十四年  
征叛王乃顏隸御史大夫玉速帖木兒麾下敗乃顏兵  
於忽爾阿剌河追至海刺兒河又敗之乃顏黨金家奴  
別不古率衆走山前從大夫追戰于札刺馬秃河殺其  
將二人追至夢哥山并擒金家奴二十五年超授顯武



將軍冬哈丹王叛從諸王乃麻互討之至斡麻站兀刺  
河等處連敗其黨阿禿八刺哈赤軍轉戰至帖麥哈必  
兒哈又敗之進至明安倫城哈丹迎戰敗走追至忽蘭  
葉兒又與阿禿一日三戰手殺五人擒裨將一人至帖  
里揭突擊哈丹挺身陷陣身中三十餘箭而還大夫親  
視其創而罪潰軍之不救者車駕親征駐蹕兀魯灰河  
伯帖木兒以兵從大夫至貴列兒河哈丹拒王師伯帖  
木兒首戰却之獲其黨駙馬阿刺渾帝悅以所獲賊將  
兀忽兒妻賜之至霸郎兒與忽都禿兒干戰殺其裨將  
五人生擒曲兒先九月大夫令率師往納兀河東等處  
招集逆黨乞答真一千戶達達百姓及女直押兒撒等  
五百餘戶二十六年春正月師還復遣戍也真大王之  
境五月海都謀擾邊有旨令伯帖木兒以其軍先來行  
至怯呂連河值拜要叛伯帖木兒卽移兵致討擒其黨  
伯顏以獻帝深加獎諭賜以所得伯顏女茶倫是年冬  
立東路蒙古軍上萬戶府統欽察乃蠻捏古思那亦勤  
等四千餘戶陞懷遠大將軍上萬戶佩三珠虎符二十  
七年哈丹復入高麗伯帖木兒奉命偕徹里帖木兒進  
討二十八年正月至鴨綠江與哈丹子老的戰失利伯  
帖木兒以聞帝命乃麻互薛徹干等征之仍命伯帖木



兒爲先鋒薛徹千軍先至禪定州擊敗哈丹踰數日乃  
麻互以兵至合攻哈丹又敗之伯帖木兒將百騎追至  
一大河虜其妻孥追奔逐北哈丹尚有八騎伯帖木兒  
止餘三騎再戰兩騎士皆重傷不能進伯帖木兒單騎  
追之至一大山日暮遂失哈丹所在乃麻互嘉其勇賞  
以老的妻完者上其功于朝賜金帶衣服鞍馬弓矢銀  
器等物并厚賚其軍二十九年聞叛王捏怯烈尚在濠  
來倉伯帖木兒率兵擊虜其妻子畜產追至陳河捏怯  
烈以二十餘騎脫身走遂定其地得所管女直戶五百  
餘以聞帝命以充漁戶伯帖木兒度地置馬站七所令  
歲捕魚馳驛以進成宗卽位俾仍其官車駕幸上京徵  
其兵千人從歲以爲常云

### 懷都

懷都幹魯納台氏祖父阿木魯與太祖同飲黑河水屢  
從征討賜銀印總大軍伐遼東女直諸部復帥師討西  
夏大戰于合刺合察兒擒夏主太祖命盡賜以夏主遺  
物繼總軍南伐攻拔信安下宿泗等州諸王塔察兒以  
阿木魯年老俾其子不花襲職中統二年不花卒子幼  
兄子懷都繼領其職中統三年春李壇叛詔懷都從親  
王哈必赤討之圍壇濟南夏四月壇夜出兵四面衝突



求出懷都直前奮擊斬百餘級俘二百餘人奪兵仗數百壇退走入城懷都晝夜勒兵與戰秋七月破濟南誅壇哈必赤第其功居最詔賜金虎符領蒙古漢軍攻海州畧淮南廬州至元三年充邳州監戰萬戶四年領山東路統軍司從主帥南征至襄陽西渡漢江宋遣水軍絕歸路懷都選士卒浮水殺宋軍奪戰艦二十餘艘虜首千餘級六年軍次淮南天長至五河口與宋兵戰敗之七年詔守鹿門山白河口一字城九年春懷都請攻樊之古城堡堡高七層懷都夜勒士卒親冒矢石攻奪之斬宋將韓撥發擒蔡路鈐襄陽既降帥師屯蔡息出

巡淮安還城正陽略地安豐獲生口無筭十一年夏宋將夏貴來攻正陽懷都領步卒薄淮西岸至橫河口逆戰退之九月略地安慶十二年北渡至柵江堡值宋軍三千餘懷都與戰敗之復南渡江駐兵鎮江謀報宋平江軍出常州懷都領兵千人至無錫與宋兵遇大戰殲其衆秋七月行省檄懷都領軍護焦山江岸仍往揚州灣頭立木城以兵守之九月權樞密院事復守鎮江宋殿帥張彥安撫劉師勇攻呂城懷都與萬戶忽刺出帖木兒追戰至常州奪舟百餘艘擒張殿帥范總管冬十月從右丞阿塔海攻常州宋朱都統自蘇州赴援懷都



提兵至橫林店與之遇奮擊大破之十一月取蘇州徇  
秀州仍撫治臨安迤東新附軍民十三年秋同元帥撒  
里蠻帖木兒張弘範徇溫州福建所至州郡迎降十四  
年授鎮國上將軍浙東宣慰使討台慶叛者戰于黃奢  
嶺又戰于溫州白塔屯寨轉戰至于漳泉興化平之十  
六年召至闕下賜玉帶弓矢授行省叅知政事至處州  
以疾卒子八忽台兒官至通奉大夫浙東道宣慰使都  
元帥平浙東建寧盜賊數有功不花子忽都答兒既長  
分襲蒙古軍千戶從平宋有功授浙西招討使改邳州  
萬戶後加榮祿大夫平章政事卒

### 亦黑迷失

亦黑迷失畏吾兒人也至元二年入備宿衛九年奉世  
祖命使海外八羅孛國十一年偕其國人以珍寶奉表  
來朝帝嘉之賜金虎符十二年再使其國與其國師以  
名藥來獻賞賜甚厚十四年授兵部侍郎十八年拜荆  
湖占城等處行中書叅知政事招諭占城二十一年召  
還復命使海外僧迦刺國觀佛鉢舍利賜以玉帶衣服  
鞍轡二十二年自海上還以叅知政事管領鎮南王府  
事復賜玉帶與平章阿里海牙右丞唆都征占城戰失  
利唆都死焉亦黑迷失言於鎮南王請屯兵大浪湖觀



釁而後動王以聞詔從之竟全軍而歸二十四年使馬  
八兒國取佛鉢舍利浮海阻風行一年乃至得其良醫  
善藥遂與其國人來貢方物又以私錢購紫檀木殿材  
并獻之嘗侍帝於浴室問曰汝踰海者凡幾對曰臣四  
踰海矣帝憫其勞又賜玉帶改資德大夫遙授江淮行  
尚書省左丞行泉府太卿二十九年召入朝盡獻其所  
有珍異之物時方議征瓜哇立福建行省亦黑迷失與  
史弼高興並爲平章詔軍事付弼海道事付亦黑迷失  
仍諭之曰汝等至瓜哇當遣使來報汝等留彼其餘小  
國卽當自服可遣招徠之彼若納款皆汝等之力也軍  
次占城先遣郝成劉淵諭降南巫里速木都刺不魯不  
都八刺刺諸小國三十年攻葛郎國降其主合只葛當  
又遣鄭珪招諭木由來諸小國皆遣其子弟來降瓜哇  
主婿土罕必閣耶旣降歸國復叛事並見弼傳諸將議  
班師亦黑迷失欲如帝旨先遣使人奏弼與興不從遂  
引兵還以所俘及諸小國降人入見帝罪其與弼縱土  
罕必閣耶沒家貲三之一尋復還之以榮祿大夫平章  
政事爲集賢院使兼會同館事告老家居仁宗念其屢  
使絕域詔封吳國公卒

拜降



拜降北庭人父忽都武勇過人由宿衛爲南宿州鎮將分守開縣後從世祖南征年幾七十每率先士卒冒矢石身被數十瘡戰功居多徙居大名路清豐縣卒贈廣平路總管封漁陽郡侯忽都卒時拜降生甫數月母徐氏鞠育教誨甚至每日吾惟一子已童州矣不可使不知學顧縣僻左無良師友遂遣從師大名城中郡守每旦望入學見拜降容止講解大異羣兒甚愛獎之比弱冠美髭髯儀表甚偉丞相阿木南攻襄陽江陵諸郡以偏裨隸麾下軍行至安陽灘與宋軍遇宋騎直前突陣陣爲却拜降卽躍馬出陣前引弓連斃數人宋騎稍却

復率衆戰良久宋師大潰至元五年圍襄樊戰有功十一年從阿木渡江水陸遇敵嘗先登陷陣勇冠一軍宋平以功授江浙省理問官時事方草創省臣有所建白及事有不可便宜自決須奏聞者以拜降善敷奏數令馳驛往咨于朝及引見世祖遙識之喜曰黑髯使臣復來耶其見器重如此二十七年遷江西行尚書省都鎮撫適徭獠擾邊拜降從丞相忙兀台討定之二十九年遷慶元路治中歲大饑狀累上行省不報拜降曰民饑如是而不賑之豈爲民父母意耶卽躬詣行省力請得發票四萬石民賴全活元貞間兩浙鹽運司同知范某



陰賊爲姦州縣吏以賂成聽驅役由是數侵暴細民民  
有珍貨腴田必奪爲己有不與則朋結無賴妄訟以羅  
織之無不蕩破家業者竟斂錄人人咸側目里人欲殺  
之不果顧被誣訴逮繫者亡慮數十人俱死獄中蘭溪  
州民葉一王十四有美田宅范欲奪之不可因誣以事  
繫獄十年不決事聞于省省下理問所推鞠之適拜降  
至官寃遂得直置范于刑而七人者先瘐死矣惟葉一  
王十四得釋時論多焉大德元年遷浙東廉訪副使令  
行禁止豪強懾伏同寅有貪穢者拜降抗章劾之于臺  
遂免其官後轉工部侍郎賜侍燕服一襲陞工部尚書  
有能聲至大二年仁宗奉皇太后避暑五臺拜降供給  
道路無有關遺恩賚尤渥比至都改資國院使母徐氏  
卒遂奔喪于杭時酒禁方嚴帝特命以酒十甕官給傳  
致墓所以備奠禮初徐氏盛年守節教子甚嚴比拜降  
貴專上于朝特旌其門及老見拜降歷官有聲譽喜曰  
有子如是吾死可瞑目矣拜降居喪盡禮未及起復延  
祐二年卒于家贈資政大夫江浙左丞諡貞惠







兵守其國外麻思躬擐甲胄平叛亂後以次子按法普代之阿塔赤從憲宗征西川軍于釣魚山與宋兵戰有功帝親飲以酒賞以白金阿里不哥叛從也里可征之至寧夏與阿藍荅兒渾都海戰率先赴敵矢中其腹不懼世祖聞而嘉之賞以白金召入宿衛中統二年扈駕親征阿里不哥追至失木里禿之地以功復賞白金三年從征李璫平之至元五年奉旨同不荅台領兵南征攻破金剛臺六年從攻安慶府戰有功七年從下五河口十一年從下松江諸郡戍鎮巢民不堪命宋降將洪福以計乘醉而殺之世祖憫其死賜其家白金五百兩

鈔三千五百貫併鎮巢降民一千五百三十九戶且命其子伯荅兒襲千戶佩金符時失烈吉叛詔伯荅兒領阿速軍一千往征之與甕吉刺只兒瓦台軍戰于押里復與藥木忽兒軍戰于禿刺及幹魯歡之地十五年春至伯牙之地與赤恰軍合戰五月駐兵呵刺牙與外刺台寬赤哥思等軍合戰其大將塔思不花樹木爲柵積石爲城以拒大軍伯荅兒督勇士先登拔之伯荅兒矢中右股別里吉迷失以其功聞賞白金三十年授虎符定遠大將軍後衛親軍都指揮使兼領阿速軍充阿速拔都達魯花赤二十二年征別失八里軍于亦里渾察



罕兒之地與禿可不早麻軍戰有功二十六年征抗海敵勢甚盛大軍乏食其母乃咬真輸已帑及畜牧等給軍食世祖聞而嘉之賜予甚厚大德四年伯蒼兒卒長子幹羅思由宿衛仕至隆鎮衛都指揮使次子福定襲職官懷遠大將軍尋改右阿速衛達魯花赤兼管後衛軍至大四年兄都丹充右阿速衛都指揮使福定復職後衛陞樞密同僉命領軍一千守遷民鎮尋授定遠大將軍僉樞密院事後衛親軍都指揮使提調右衛阿速達魯花赤二年進資善大夫同知樞密院事後至元間進知樞密院事

### 步魯合荅

步魯合荅蒙古弘吉刺氏祖按主奴太宗時率蒙古軍千人從諸王察合台征河西至山丹攻下定會階文諸州以功爲元帥佩金符駐軍漢陽禮店戍守西和階文南界及西蕃邊境換金虎符真除元帥父車里襲職從都元帥紐璘攻成都宋將劉整以重兵守雲頂山車里擊敗之進圍其城整遣裨校出戰敗走追至簡州斬之殺三百餘人遂拔其城攻重慶車里將兵千人爲先鋒渡馬湖江敗宋兵于馬老山俘獲百餘人戊午諸軍還屯灰山宋兵夜來劫營車里擊敗之斬首三百級世祖



卽位賜金符爲奧魯元帥又改征行元帥至元二年車  
里以老疾不任事諸王阿只吉命步魯合荅代領其軍  
至元八年制授管軍千戶佩金符宋將智萬壽攻成都  
僉省嚴忠範遣步魯合荅將兵七百人禦之于沙坎流  
矢中右頰拔矢戰愈力大敗其軍十一年行院汪田哥  
以兵圍嘉定步魯合荅卽率其衆攻九頂山破之嘉定  
降進攻重慶宋軍突圍出走銅鑼峽行院忽敦遣步魯  
合荅追之至廣羊垠斬首二百級瀘州叛還軍討之步  
魯合荅以所部兵攻寶子寨歲餘不下乃造雲梯先登  
急擊遂破之殺虜殆盡十六年取重慶以功遷武略將  
軍征行元帥二十一年命統蒙古探馬赤軍千人從征  
金齒蠻平之都元帥蒙古歹征羅必甸步魯合荅率游  
兵先行江水暴溢率衆泅水而渡去城三百步而營居  
七日諸軍會城下乃進攻之步魯合荅先登拔其城遂  
屠之又從征八百媳婦國至車厘車厘者其酋長所居  
也諸王濶濶命步魯合荅將游騎三百往招之降不聽  
進兵攻之都鎮撫侯正死焉步魯合荅毀其北門木遂  
入其寨其地悉平賜金虎符授懷遠大將軍雲南萬戶  
府達魯花赤卒子忙古不花襲管軍千戶初按主奴三  
子長車里次黑子次帖木兒黑子別賜金符爲奧魯元



元史卷一百三十三 列傳 四  
帥兼文州吐蕃達魯花赤卒其子那懷幼以帖木兒攝其官那懷長解職授之遂改授帖木兒隨路拔都萬戶後移鎮重慶卒

玉哇失

玉哇失阿速人父也烈拔都兒從其國主來歸太宗命充宿衛歲戊午從憲宗征蜀爲游兵前行至重慶戰數有功嘗出獵遇虎於隘下馬搏虎虎張吻欲噬之以手探虎口抉其舌拔所佩刀刺而殺之帝壯其勇賞黃金五十兩別立阿速一軍使領其衆從世祖征阿里不哥又從親王哈必失征李壇俱有功賜金符授本軍千戶

從下襄陽又從下沿江諸城宋洪安撫旣降復叛誘其入城宴乘醉殺之長子也速歹兒代領其軍從攻揚州中流矢卒玉哇失襲父職爲阿速軍千戶從丞相伯顏平宋賜巢縣二千五十二戶只兒瓦歹叛率所部兵擊之至懷魯哈都擒其將失刺察兒斬于軍其衆悉平諸王和林及失刺等叛從皇子北安王討之至斡耳罕河無舟躍馬涉流而渡俘獲甚衆時北安王方戰失利陷敵陣中玉哇失從諸王藥木忽兒追至金山王乃得脫歸賞白金五十兩鈔二千五百貫改賜金虎符進定遠大將軍前衛親軍都指揮使諸王乃顏叛世祖親征玉



哇失爲前鋒乃顏遣哈丹領兵萬人來拒擊敗之追至不里古都伯塔哈之地乃顏兵號十萬玉哇失陷陣力戰又敗之追至失列門林遂擒乃顏帝嘉其功賜金帶只孫錢幣甚厚乃顏餘黨塔不金家奴聚兵滅捏該從大軍討平之既而哈丹復叛於曲連江追擊其軍渡河而遁又與海都將八憐帖里哥必里察等戰於亦必兒夫必兒之地戰屢捷成宗時在潛邸帝以海都連年犯邊命出鎮金山玉哇失率所部在行從皇子濶濶出丞相朶兒朶懷擊海都軍突陣而入大破之復從諸王藥木忽兒丞相朶兒朶懷擊海都將八憐八憐敗海都復以秃苦馬領精兵三萬人直趨撒刺思河欲據險以襲我師玉哇失率善射者三百人守其隘注矢以射竟全軍而歸帝嘉之賜鈔萬五千緡金織段三十匹海都朶哇以兵來襲擊走之武宗鎮北邊海都復入寇至兀兒秃玉哇失敗之獲其駝馬器仗以獻時扎魯花赤孛羅帖木兒所將兵爲海都困於小谷帝命玉哇失援出之帝喜謂諸將曰今日大丈夫之事舍玉哇失其誰能之縱以黃金包其身猶未足以厭朕志武宗南還命玉哇失後從敵懼莫敢近因留之戍邊賜以金察刺二玉東蒂渾金段各一仍賜秣米七十石使爲酒以犒其



軍後海都子察八兒等遣人詣闕請和朝廷許之遂撤邊備玉哇失乃還帝錄其功賜鈔五萬貫進鎮國上將軍仍舊職大德十年五月晝寢于衛舍不疾而卒子亦乞里歹襲亦乞里歹卒子拜住襲

麥里

麥里徹兀臺氏祖雪里堅那顏從太祖與王罕戰同飲班真河水以功授千戶領徹里臺部征討諸國卒于河西父麥吉襲職從太宗定中原以疾卒麥里襲職從定宗略定欽察阿速斡魯思諸國從憲宗伐宋有功世祖即位諸王霍忽叛掠河西諸城麥里以爲帝初卽位而

王爲首亂此不可長與其弟桑忽荅兒率所部擊之一月八戰奪其所掠扎刺亦兒脫脫憐諸部民以還已而桑忽荅兒爲霍忽所殺帝聞而憐之遣使者以銀鈔羊馬迎致麥里賜號曰荅刺罕尋卒子秃忽魯

探馬赤

探馬赤秃立不帶人從諸王沒赤征蜀後以兵從塔海紺十火魯赤紐璘諸大帥歲戊午紐璘攻涪州還至馬湖江宋兵連艦絕江不得進探馬赤率精兵二千擊之奪其丹以濟又於橫江嘉定宣化三縣造浮橋以達成都紐璘以爲能命將千人從萬戶昔力荅略地礪門黎



元史卷一百三十一 列傳 七  
雅土蕃昔力荅死行院帖赤以探馬赤爲萬戶領其軍  
中統四年授蒙古漢軍萬戶至元九年從行省也速帶  
兒征建都獨以銳卒千五百人與建都兵戰于梅子嶺  
大敗之夜馳與速哥會直擣其營斬首數十級生擒百  
餘人獲其輜重以歸復益兵三千人與左丞曲立吉思  
乘勝進擊建都勢蹙請降又從行院汪田哥忽敦等攻  
嘉定重慶瀘敘諸州以功兼崇慶府達魯花赤十九年  
卒子拜延襲蒙古軍萬戶戍甘州

### 拔都兒

拔都兒阿速氏世居上都宜興憲宗在潛邸與兄兀作  
兒不罕及馬塔兒沙帥衆來歸馬塔兒沙從憲宗征麥  
各思城爲前鋒將身中二矢奮戰拔其城又從征蜀至  
釣魚山歿于軍拔都兒從征李壇圍濟南身二十餘戰  
世祖嘉其能賞納失思段九命領阿速軍一千常居左  
右尋於阿塔赤內充怯薛百戶後從塔不台南征與敵  
軍戰于金剛臺又以功受賞師還言於帝曰臣願從軍  
爲國效死世祖留之仍命充孛可孫兼領阿速軍御馬  
必令鞆引至元二十三年授廣威將軍後衛親軍副都  
指揮使賜虎符明年夏從征乃顏于亦迷河擒僉家奴  
塔不台以歸賞鈔及衣段加定遠大將軍大德元年卒



子別吉連襲至大四年河東陝西鞏昌延安燕南河北  
遼陽河南山東諸翼衛探馬赤爭草地訟者二百餘起  
命往究之悉正其罪積官懷遠大將軍致和元年從丞  
相燕鐵木兒擒倒刺沙黨烏伯都刺等領諸衛軍守居  
庸關及諸要害地天曆元年十月王禪兵掩至羊頭山  
攻破隘口勢甚張別吉連從丞相擁眾奮擊之突入其  
軍王禪敗走文宗賜御衣二襲三珠虎符及弓矢甲冑  
金帛等物以旌其功尋以疾辭子也連的襲

昂吉兒

昂吉兒張掖人姓野蒲氏世爲西夏將家歲辛巳父昔

率所部歸太祖以其軍隸蒙古軍籍仍以甘卜爲千  
戶主之從木華黎出征病卒昂吉兒領其父軍從征諸  
國有功至元六年授本軍千戶佩金符俄略地淮南所  
向無前時國兵初南塞馬當暑往往疥癘昂吉兒以所  
部馬入太行療之所病良已由是軍中馬病者率以屬  
焉歲療馬以萬數宋輸糧金剛臺意將深入昂吉兒將  
兵馳往斷其輸道因上言河南邊郡與宋對境宋兵時  
爲邊患唐州東南皆大山信陽在蔡州南南直九里武  
陽平靖五水等關宋兵必經諸關以入信陽實其咽喉  
守禦莫急焉往年金亡朝廷得壽泗襄郢而不留兵守



卒使宋得之請城信陽以扼宋得旨令率河西軍一千三百人城之城成九年加明威將軍信陽軍萬戶佩虎符分木華黎及阿木所將河西兵俾將之加懷遠大將軍丞相伯顏渡江留阿木定淮南東道其西道則屬之昂吉兒駐兵和州宋淮西制置夏貴遣侯都統將兵四萬來攻有謀內應者悉誅之潛兵出千秋澗塞其歸路因出城奮擊大敗之獲人馬千計鑿巢軍降阿速軍戍之人不堪其橫都統洪福盡殺戍者以叛昂吉兒攻拔其城擒福及董統制譚正將遂攻廬州夏貴使人來言曰公毋吾攻爲也吾主降吾卽降矣宋亡貴舉所部納

款昂吉兒入廬州民按堵無所犯遷鎮國上將軍淮西宣慰使宋丞相文天祥復起兵海道舒民張德興應之襲破興國德安諸郡還據司空山詔昂吉兒攻之一戰而定殺張德興執其三子以獻江左初平官制草創權臣阿合馬納賂鬻爵江南官僚冗濫爲甚郡守而下佩金符者多至三四人由行省官舉薦超授宣慰使者甚衆民不堪命昂吉兒入朝具爲帝言之且枚舉不循資歷而驟陞者數人帝驚曰有是哉因謂姚樞等曰此卿輩所知而不爲朕言昂吉兒顧言之邪卽命偕平章哈伯左丞崔斌翰林承旨和魯火孫符寶奉御董文忠減



汰之選曹以清仍詔諭江淮軍民俾通知之時兩淮兵革之餘荆榛蔽野昂吉兒請立屯田以給軍餉帝從之既而阿塔海言屯田所用牛農具甚衆今方有事日本若復調發民兵將不勝動搖矣議遂寢未幾宣慰使燕楠復以爲言帝乃遣數千人卽芍陂洪澤試之果如昂吉兒所言乃以二萬兵屯之歲得米數十萬斛加輔國上將軍河南行省參知政事准宣慰使都元帥進驃騎衛上將軍行中書省左丞加龍虎衛上將軍行尚書省右丞兩官皆兼淮西使帥日本不庭帝命阿塔海等領卒十萬征之昂吉兒上疏其略曰臣聞兵以氣爲主而上下同欲者勝比者連事外夷三軍屢屛不一以言氣海內騷然一遇調發上下愁怨非所謂同欲也請罷兵息民不從既而師果無功昂吉兒屢爲直言雖帝怒甚其辭不少屈臺臣慮昂吉兒難制以牙以迷失不畏強禦奏爲本道按察使以察之牙以迷失時摺撫昂吉兒細故以聞及廷辨帝察其無他輒遷其官後竟以微過罪之元貞元年卒子五人其顯者曰昂阿禿廬州蒙古漢軍萬戶府達魯花赤曰暗普海北海南道蕭政廉訪使孫教化的世襲千戶

哈刺解



哈刺解哈魯氏初從軍攻襄樊蒙古四萬戶府辟爲水軍鎮撫至元十二年從丞相伯顏渡江改管軍百戶賞甲冑銀鞘刀十二年秋從丞相阿朮與宋兵戰焦山敗之獲海舟二阿朮與王世強招討造白鷄海船百艘就四十一萬戶翼摘遣漢軍三千五百新附軍一千五百俾哈刺解王世強并統之攻宋江陰許浦金山上海崇明金浦皆下之獲海船三百餘艘遂戍澈浦海口十三年春行省檄充沿海招討副使宋將張世傑舟師至慶元胸山東門海界哈刺解追之獲船四艘上其功行省增撥軍七百并舊所領士卒守定海港口秋七月宋昌國州胸山秀山戍兵舟師千餘艘攻奪定海港口哈刺解迎擊虜其裨將并海船三艘八月宋兵復攻定海港口哈刺解擊退之行省檄充蒙古漢軍招討使十月哈刺解引兵至温州青魯門遇宋兵奪船五艘遣使諭温州守臣家之柄以城降十一月至福州奪宋海船二十艘擒毛監丞等十四年賜金符宣武將軍沿海招討副使行省檄充沿海經略副使俾與劉萬戶行元帥府事於慶元鎮守沿海上下南至福建北趾許浦六月行省檄充沿海經略使兼左副都元帥督造海船千艘八月有旨江西省右丞塔出等進兵攻廣南哈刺解以兵從



十月遣昭勇大將軍沿海招討使時宋處州兵復溫州  
哈刺歹率兵復取之進至潮陽縣宋都統陳懿等兄弟  
五人以畚兵七千人降塔出兵攻廣州踰月未下哈刺  
解引兵繼至諭宋安撫張鎮孫侍郎譚應斗以城降從  
攻張世傑于大洋獲其軍資器械不可勝計諭南恩州  
宋閣門宣贊舍人梁國傑以畚軍萬人降十五年還軍  
慶元秋八月入覲帝問曰汝何氏族對曰臣哈魯人賜  
金織文衣鞍勒擢昭武大將軍沿海左副都元帥慶元  
路總管府達魯花赤將所部軍戍海口十六年日本商  
船四艘篙師二千餘人至慶元港口哈刺歹謀知其無

他言于行省與交易而遣之海賊賀文遠顧潤等寇掠  
海島哈刺歹諭降之得舟六十餘艘十八年擢輔國上  
將軍都元帥從國兵征日本值颶風舟回明年二月還  
戍慶元二十二年罷都元帥改沿海上萬戶府達魯花  
赤二十四年入朝帝問日本事宜哈刺歹應對甚悉令  
還戍海道授浙東宣慰使賜金織文段玉束帶鞍勒弓  
矢有差二十五年樞密以水軍乏帥奏兼前職冬徵入  
見明年拜金吾衛上將軍中書左丞行浙東道宣慰使  
領軍職如故大德五年徵入見擢資德大夫雲南行省  
右丞借劉深征八百媳婦國至順元年宋龍濟等叛喪



師而還深誅哈刺歹亦以罪廢十一年以疾卒于汝州  
皇慶元年贈榮祿大夫平章政事鞏國公諡武惠子哈  
刺不花襲沿海萬戶府達魯花赤

### 沙全

沙全哈刺魯氏父沙的世居沙漠從太祖平金戍河南  
柳泉家焉全初名杪兒赤甫五歲爲宋軍所虜年十八  
留劉整幕下宋人以其父名沙的使以沙爲姓而名曰  
全全久居宋險固備知之中統二年整以瀘州來歸全  
與之同行宋軍追之全力戰得脫授管軍百戶至元三  
年整出兵雲頂山與宋將夏貴兵遇全擊殺甚衆五年

命整領都元帥事出師圍襄樊以全爲鎮撫整遣全率  
軍攻仙人山陳家洞諸寨破之陞千戶賜銀符敗宋將  
張貴拔樊城與劉整軍會修正陽城引兵渡淮與宋將  
陳安撫戰敗之十二年從丞相阿朮與宋將張世傑孫  
虎臣大戰于焦山水陸並進宋人不能支盡棄鼓旗走  
獲其將士三十三人從攻常州克之乘勝下沿海諸城  
至華亭戒士卒毋殺掠遂傾城出降以功授華亭軍民  
達魯花赤時民心未定有未附鹽徒聚衆數萬掠華亭  
全擊破之籍其名得六千人請于行省遣屯田于淮之  
芍陂行省以邑人新附時有叛側委萬戶忽都忽等體



察欲屠其城全言鹽卒多非其土人若屠之枉死者眾以死保其不叛遂止賜金符加武略將軍兼領鹽場職如舊尋陞華亭爲府以全爲達魯花赤賜虎符時盜賊蠢起其最盛者有眾數千人全悉招來之境內得安改松江萬戶府達魯花赤始專領軍政二十二年召見遷隆興萬戶府達魯花赤得請復舊名曰杪兒赤未幾帝以爲松江瀕海重地復命鎮之賜三珠虎符卒于官

帖木兒不花

帖木兒不花塔塔里帶人父帖赤歲乙未同都元帥塔海紺卜將兵入蜀并將蒙古也可明安和少馬頰及

手諸軍攻下興元利劔成都諸郡所降宋將小王大尉之眾悉隸麾下中統二年賜虎符授西川便宜都元帥俄進行樞密院率諸軍略定西川未下郡邑至元元年遷益都等路統軍使死軍中帖木兒不花中統初入備宿衛至元七年授虎符代張馬哥爲淄萊水軍萬戶將其眾赴襄陽與宋將范文虎戰于灌子灘手殺四十餘人奪其戰艦追至雲勝洲大敗之行省上其功賜白金五十兩衣一襲鞍轡一副九年授益都新軍萬戶十一年改益都淄萊新軍萬戶從丞相伯顏伐宋敗其大將夏貴於陽羅堡大軍渡江論其功最多賜白金五百兩



又從下鄂斬黃江建康常秀蘇杭諸郡累加昭武大將軍從參知政事阿刺罕略定紹興溫台福建諸郡授台州路總管府達魯花赤遷廣東宣慰使十六年加都元帥追宋將張世傑於香山島世傑死降其衆數千人廣東諸郡及海島盡平領諸降臣及將校之有功者入見於大安閣命大府監視其身製銀鼠裘成親賜予之授中書左丞行省江西其餘爵賞有差二十五年拜四川等處行尚書省平章政事兼總軍務改行中書省平章政事其兄帖木脫斡初以蒙古軍千戶從伐蜀有功行樞密院承制授萬戶并將列別術塔海帖木兒也速帶兒匣刺撒兒四千戶軍從大軍攻重慶重慶降收其衆徇下流諸城留鎮夔門兼本路安撫司達魯花赤進懷遠大將軍蒙古軍萬戶遷定遠大將軍兼嘉定守鎮萬戶本路總管府達魯花赤尋陞鎮國上將軍諸蠻夷部宣慰使加都元帥亦奚不薛蠻畔與岳刺海會雲南兵討平之改征緬都元帥死于軍子忽都答兒嗣



元史卷一百三十三  
列傳第二十三  
翰林待制學士亞突知制誥兼脩國史臣宋 廉  
翰林待制學士直學知制誥兼脩國史編管臣王 禕等奉勅脩

元史卷一百三十三

列傳第二十三

皇明翰林學士亞突知制誥兼脩國史臣宋 廉

翰林待制學士直學知制誥兼脩國史編管臣王 禕等奉勅脩

塔出

塔出蒙古札刺兒氏父札刺台歷事太祖憲宗歲甲寅  
奉旨伐高麗命業吉忽刺出諸王並聽節制其年破高  
麗連城舉國遁入海島已未正月高麗計窮遂內附札  
刺台之功居多塔出以勲臣子至元十七年授昭勇大



元史卷一百三十三 列傳  
將軍東京路總管府達魯花赤十八年召見賜鈔六十錠旌其廉勤陞昭毅大將軍開元等路宣慰使改遼東宣慰使二十二年入覲帝慰勞久之且問曰太祖命爾父札剌台聖旨爾能記否塔出應對周旋不踰禮節帝嘉之賜以玉帶弓矢拜龍虎衛上將軍東京等路行中書省右丞復授遼東道宣慰使塔出探知乃顏謀叛遣人馳驛上聞有旨命領軍一萬與皇子愛也赤同力備禦女直水達達官民與乃顏連結塔出遂棄妻子與麾下十二騎直抵建州距咸平千五百里與乃顏黨太撒拔都兒等合戰兩中流矢繼知其黨帖哥抄兒赤等欲襲皇子愛也赤以數十人退戰于餘人扈從皇子渡遼水乃顏軍來襲塔出轉鬪而前射其酋帖古友中其口鏃出于項墮馬死追兵乃退遂軍懿州州老幼千餘人焚香羅拜道傍泣曰非宣慰公吾屬無遺種矣塔出口今日之事上賴皇帝洪福下賴將士之力吾何功焉至遼西羆山北小龍泊得叛酋史禿林台盧全等納款書期而不至塔出即遣將討擒之又獲其黨王賽哥復與曲迭兒大王等戰破之將士欲俘掠塔出一切禁止與僉院漢爪監司脫脫台追乃顏餘黨北至金山戰捷帝嘉其功召賜黃金珠璣錦衣弓矢鞍勒二十八年賜明



珠虎符充蒙古軍萬戶是歲復領軍討哈丹于女直還  
攻建州逐阿海投江死明年哈丹涉海南襲高麗塔出  
復進兵討之入朝世祖嘉其功眷遇彌渥復賜珍珠上  
服拜榮祿大夫遼陽等處行中書省平章政事兼蒙古  
軍萬戶卒于位子答蘭帖木兒中奉大夫遼陽省叅知  
政事

拜延

拜延河西人父火奪都以質子從太祖征河西太祖立  
質子軍號秃魯花遂以火奪都爲秃魯花軍百戶太宗  
朝都元帥紐璘承制以爲千戶從征西川忽都叛于臨

洮世祖命火奪都等以蒙古漢軍從大軍往討之火奪  
都卒拜延襲至元九年制授征行千戶佩金符十年宋  
師侵成都四川僉省嚴忠範遣拜延迎擊大敗之又從  
行省也速帶兒攻嘉定從行院忽敦取瀘叙攻重慶數  
有戰功十二年行院承制以爲東西兩川蒙古漢軍萬  
戶總帥汪田哥用兵忠州命拜延將兵二千往涪州策  
應之宋人伺知田哥回以舟師順流而下邀于清江拜  
延引兵馳赴擒其部將李春等十七人取其軍資焚其  
戰艦十三年瀘州復叛行院遣拜延領兵趨瀘之珍珠  
堡敗其將王世昌俘掠其民人孳畜移兵戍暗溪砦宋



合州兵來援拜延生擒百餘人戮之遂克瀘州行院副使卜花進兵圍重慶遣拜延將兵游擊獲大良平李立所遣謀者四人重慶降制授宣武將軍蒙古漢軍總管十九年從總帥汪田哥入見陞懷遠大將軍管軍萬戶改賜金虎符卒子答察兒嗣授明威將軍興元金州萬戶府達魯花赤

也罕的斤

也罕的斤匣刺魯人祖匣答兒密立以幹思堅國哈刺魯軍三千來歸於太祖又獻羊牛馬以萬計以千戶從征回回諸國又從睿宗及折別兒諭降河西諸城後從

攻臨洮死焉父密立火者從太宗滅金又從憲宗攻蜀爲萬戶府達魯花赤歿于軍中統二年也罕的斤爲千戶數有戰功下五花石城白馬等砦至元七年宋兵入成都也罕的斤以兵四百人與之相拒四日宋兵退追擊于眉州大破之授蒙古匣刺魯河西漢軍萬戶戌眉州從圍嘉定築懷遠砦以守其要害宋兵出戰輒敗十二年入朝賜對衣玉束帶白金百兩加昭勇大將軍上萬戶益兵萬人會圍重慶盡督馬湖江兩岸水陸軍馬十四年從圍瀘州攻神臂門先登拔之從行樞密副使卜花攻重慶屯佛圖關屢戰有功移屯堡子頭宋守將



趙安開門降重慶既平復將其衆畧地思州得降將百餘人加昭毅大將軍帝以西川新附選能鎮撫之者授嘉定軍民西川諸蠻夷部宣撫司達魯花赤增戶萬餘進奉國上將軍四川宣慰使都元帥十七年征幹端拜雲南行省叅知政事二十一年與右丞大卜諸王相吾谷兒分道征緬造舟于阿昔阿禾兩江得二百艘進攻江頭城拔之獲其銳卒萬人命都元帥來世安守之且圖其地形勢遣使詣闕具陳所以攻守之方先是既破江頭城遣黑的兒楊林等諭緬使降不報而諸叛蠻據建都大公城以拒大軍復遣僧諭以禍福反爲所害遂督其軍水陸並進擊破之建都金齒等十二城皆降命都元帥合帶萬戶不都蠻等以兵五千戍之二十八年改四川行樞密副使卒子二人火你赤的斤雲南都元帥也連沙襲蒙古軍萬戶

葉僊鶻

葉僊鶻畏吾人父土堅海牙以才武從太祖太宗平金及西夏俱有功僊鶻幼事世祖于潛藩從征土蕃雲南常爲前驅歲己未伐宋至鄂州先登奪其外城中統元年從征阿里不哥與其黨遇大呼馳擊之其衆駭潰賞白金貂裘明年討李璫以功賞白金五百兩授西道都



元帥金虎符土蕃宣慰使仙鶴素熟夷情隨地阨塞設屯鎮撫之恩威兼著頑獷皆悅服賜金幣鈔及玉束帶爲宣慰使歷二十四年遷雲南行省平章政事尋改江西行省平章政事巨盜鍾明亭積年爲害仙鶴討擒之至元三十一年成宗卽位召還賜玉帶改陝西行省平章政事謝事歸隴右十年卒贈協恭保節功臣太保儀同三司上柱國鞏國公謚敏忠子完澤太子詹事進金紫光祿大夫中書平章政事

脫力世官

脫力世官畏吾人也祖八思忽都探花愛忽赤國初領畏吾阿剌溫滅乞里八思四部以兵從攻四川歿于軍父帖哥木探花愛忽赤憲宗命長渴密里及曲先諸宗藩之地渾都海阿藍荅兒叛執帖哥木械繫之帖哥木破械脫走入覲世祖賜金符襲父職命率所部兵就征之以功賜衣服弓矢鞍勒又命從諸王奧魯赤討建都平之陞昭勇大將軍羅羅斯副都元帥同知宣慰司事至西蕃境上蕃酋必刺充遮道不得進帖哥木戰却之道遂通事聞賜金虎符賞白金及衣二襲卒于官脫力世官襲職爲武德將軍羅羅斯副都元帥同知宣慰司事其所部有產金戶叛服不常脫力世官往討平之



定昌路總管谷納叛與其千戶阿夷謀率衆渡不思魯河脫力世官引兵戰擒阿夷殺之德平路落來民又叛脫力世官又討平之亦奚不薛地未附民多立寨依險自保詔雲南行省調羅羅斯蒙古軍四百人羅羅章六百入屬脫力世官從左丞愛魯往討之脫力世官先至拔其寨愛魯命率兵攻羅羽抵落穿奪其關獲馬牛羊以給士卒又命與萬戶兀都蠻攻怯兒地其酋長阿失提山寨不下脫力世官先登破之愛魯遂命脫力世官總左手四翼兵討平亦奚不薛又有蠻子童者立寨于納土原山行省復命脫力世官以蒙古勳勅軍與行省

叅政阿合八失攻之子童窟初感遂降進兼管軍副萬戶蠻細狗折興等及威龍州判官阿遮皆憑險爲亂脫力世官夜入據其寨賊散走遣兵搜山谷獲阿遮于深菁斬之籍其民五百餘戶爲農脫力世官入覲授三珠虎符加懷遠大將軍羅羅斯宣慰使兼管軍萬戶旣還治括戶口立賦稅以給屯戍昌州蘓你巴翠等作亂脫力世官以雲南王命討降之徙其衆于昌州平川鎮守千戶任世祿以所部二千人乘間遁去屯威龍州脫力世官先據其要路阨之世祿降未幾入覲卒于京師子峻南班由宿衛襲職佩三珠金虎符官至鎮國上將軍



忽刺出

忽刺出蒙古氏魯祖阿察兒事太祖爲博兒赤祖赤脫  
兒從太宗征欽察康里回回等國有功爲涿州達魯花  
赤卒伯父哈蘭木襲職佩金符以功稍遷益都路蒙古  
萬戶歿于軍忽刺出襲哈蘭木職初授昭勇大將軍至  
元十二年攻宋六安軍行省命領諸軍戰艦遇宋軍敗  
之有旨褒賞軍次安慶忽刺出及參政董文炳領山東  
諸軍與宋孫虎臣等戰于丁家洲大敗之俘其將校三  
十七軍五千船四十戰于朱金沙又敗之七月及宋人  
戰于焦山江中時丞相阿朮督戰忽刺出與董文炳冒  
矢石泝流鏖戰八十里身被數傷裹創殊死戰宋張殿  
帥攻呂城忽刺出與萬戶懷都生擒之從下常州各地  
蘓湖秀州至長橋大敗宋軍大軍至臨安伯顏命忽刺  
出守浙江亭及北門敗揚州軍于揚子橋又敗真州軍  
追李庭芝至通州海口盡降淮東諸州江南平加昭毅  
大將軍尋遷湖州路達魯花赤十四年進鎮國上將軍  
淮東宣慰使奉旨屯守上都改嘉議大夫行臺御史中  
丞陞資善大夫福建行省左丞遷江淮行省除右丞拜  
榮祿大夫江浙行省平章政事以疾卒

重喜



重喜東呂紕氏祖塔不已兒事太宗爲招討使征信安河南授金虎符改征行萬戶卒父脫察刺襲賊歲己未從南征破十字寨時重喜從行戰亦屢捷左足中流矢勇氣益倍世祖親勞之曰汝年幼能爲朕宣力如是深可嘉尚父卒重喜襲職中統三年從征李璫有功四年命領兵鎮莒州至元十二年奉旨築十字路城備守禦重喜常率兵游擊四年從抄不花征泗州時蔡千戶爲宋兵所圍重喜奮戰救之五年入覲帝嘉其功賜白金金鞍弓矢修正陽城十一年宋兵圍正陽從大軍戰敗之十二年從下漣海諸城又敗宋將李提轄遂駐兵瓜

洲十三年夏六月宋都統姜才率師來攻迎戰郟之秋七月從大軍襲擊宋將李庭芝于泰州進昭勇大將軍夔州路總管府達魯花赤卒子慶孫襲

旦只兒

旦只兒蒙古答答帶人至元七年從征蜀敗宋兵于馬湖江斬首百餘級九年從征建都蠻十一年從攻嘉定敗宋兵於夾江又從攻下瀘叙諸州進圍重慶敗宋將張萬瀘州叛諸軍將攻瀘旦只兒先將其衆據紅米灣與宋兵戰敗之進至安樂山復敗宋軍斬首五百餘級獲戰艦四宋兵邀漕舟於安樂山擊走之遂破其石磬



寨十四年春抵瀘州奪其戰艦五艘還至安樂山復與  
宋兵戰殺數十人從諸軍拔瀘州張萬舉兵欲向合州  
旦只兒以銳卒千人邀擊於龍坎斬首百餘級萬引卻  
賜銀符授管軍千戶從征幹端至甘州賜金符陞總管  
十九年從諸王合班元帥忙古帶軍至幹端與叛王元  
盧等戰勝之二十年諸王八巴叛以兵來攻旦只兒獨  
破其五百餘衆拔亡卒二千餘人以出進副萬戶還戍  
長寧軍宋好止寨以兵來襲旦只兒擊走之斬首百餘  
級生獲三十餘人二十六年賜金虎符授信武將軍平  
陽等路萬戶府達魯花赤卒子建都不花襲

脫歡

脫歡札剌兒台氏祖菊者父脫端爲萬戶從皇子闊出  
忽都秃畧汴宋睢宿等州歲癸丑鎮蔡州脫端卒子不  
花襲不花卒弟阿藍答兒襲阿藍答兒卒弟長壽襲並  
爲千戶守蔡長壽卒脫歡襲加武畧將軍佩金符從丞  
相阿木攻陽邏堡累有戰功渡江攻鄂漢諸州下之會  
宋軍于丁家洲脫歡突入奪戰艦數艘攻建康太平等  
郡下之宋都統姜才攻楊子橋堡脫歡率精兵出堡東  
逆之斬殺幾盡俄而宋軍復集堡北遂奮擊走追至揚  
州殺傷甚衆會萬戶昔里罕入朝道滁州爲宋兵所遮



擊敗宋兵出昔里罕從攻揚州至泥湖遇宋軍奪三十餘艘遂進兵蘓州與宋軍戰擒柳奉使至元十三年右丞相遣脫歡援高郵軍未至二十里會宋將率兵來漕高郵粟與戰擒之有頃宋高郵都統復率二萬人至擊敗之十四年春授懷遠大將軍太平路總管府達魯花赤會只里瓦帶寇北邊帝命脫歡往討之戰左臂中流矢二帝慰勞之賜鎧甲弓矢鞍勒鈔千五百緡十五年春從親王幹魯忽台丞相孛羅西征有功加定遠大將軍福州路總管府達魯花赤平閩盜改武昌路卒

### 完者拔都

完者拔都欽察氏其先彰德人以才武從軍歲己未從世祖攻鄂州登城斬馘賞銀五十兩中統三年從諸王合必赤征李壇於濟南力戰有功至元四年從萬戶木花里掠地荆南至襄陽與宋兵戰屢勝之遂爲梯登樊城焚樓櫓勇冠三軍十一年授武畧將軍彰德南充新軍千戶攻沙洋新城始授金符領丞相伯顏帳前合必赤軍渡江論功改武義將軍戰于丁家洲及楊子橋焦山破常州入臨安攻泰州新城皆預焉江南歸附入見賜號拔都兒佩金虎符遷信武將軍管軍總管高郵軍達魯花赤首以興學勸農爲務四方則之郡有虎傷人



手格殺之既而高郵陞爲路進懷遠大將軍高郵路達  
魯花赤十六年進昭勇大將軍管軍萬戶十八年闖賊  
陳吊眼作亂擢鎮國上將軍福建等處征蠻都元帥賜  
翎根甲命往討之破其營擒吊眼至漳州斬以示衆加  
管軍萬戶兼高郵路達魯花赤賞賜無筭二十三年進  
驃騎衛上將軍江浙等處行中書省左丞仍管軍萬戶  
遷浙西行中書省右丞行浙西宣慰使二十七年轉資  
德大夫江西等處行樞密院副使兼廣東宣慰使元貞  
元年入朝拜榮祿大夫江浙等處行中書省平章政事  
卒于官年五十九贈効忠宣力定遠功臣開府儀同三  
司太尉上柱國追封林國公諡武宣

失里伯

失里伯蒙古人祖慤古里禿從太祖經畧西夏有功又  
隸諸王木赤台領寶兒赤與金人戰歿于陣父莫刺合  
嗣從征阿藍荅兒亦有功世祖賜以白金五十兩失里  
伯世其職由樞密院斷事官爲河南行中書省斷事官  
至元七年佩金虎符引水軍四萬攻襄陽八年七月宋  
將范文虎來援失里伯敗其軍進圍樊城先登戰于鹿  
門與諸軍擒其將張貴十年遷昭勇大將軍爲耽羅國  
招討使奉旨入見上都改管軍萬戶領襄陽諸路新軍



從丞相伯顏等渡江破獨松關下長興取湖州行安撫  
司事十四年授湖州總管進鎮國上將軍淮西道宣慰  
使十八年卒子塔刺赤曲靖等路宣慰使

### 李蘭奚

李蘭奚雍吉烈氏世居應昌祖忙哥以后族備太祖宿  
衛父律實狀貌魁偉有謀善騎射太宗嘗問以軍旅之  
事應對稱旨即命爲千戶尋以爲齊王府司馬後從睿  
宗伐金有功詔還宿衛以疾卒李蘭奚英邁有父風幼  
孤能自刻厲如成人暇日習弓馬夜則讀書其母嘗訓  
之曰汝父忠勇絕人天不假年汝能自立則汝父歿無

憾矣李蘭奚由是感激期以成父之志從軍有功襲父  
官爲齊王司馬世祖親征乃顏以齊王兵從兵始交李  
蘭奚躍馬陷陳斬其旗所嚮披靡世祖遙望見壯之有  
頃乃顏兵遁走李蘭奚馳歸以捷聞世祖大悅勞之曰  
無忝爾父矣賜黃金五十兩金織文二疋授宣威將軍  
信州路達魯花赤時江南初附帝宣上意與民更始期  
年郡中大治部使者以聞帝獎嘆久之即遣使賜以上  
尊俄以疾卒年三十三贈河間路達魯花赤追封范陽  
郡侯子脫穎溥化歷監察御史河南廉訪副使郴州路  
達魯花赤



怯烈

怯烈西域人世居太原由中書譯史從平章政事賽典赤經畧川陝至元十二年立雲南行省署爲幕官諸洞蠻夷酋長款附怯烈功居多十五年分省大理會緬人入寇怯烈卽以戰具資軍士討平之授行中書省左右司員外郎十八年平章納速刺丁遣詣闕敷奏邊事世祖愛其聰辨練達錫虎符拜鎮西緬麓川等路宣撫司達魯花赤兼管軍招討使成都烏蒙諸驛阻絕怯烈帝馬給傳往來便之俄被召上京問以征緬事宜奏對稱旨賜幣帛及芻根甲諸王相吾荅兒右丞太子征緬命

怯烈率兵船爲鄉導拔其江頭城振旅而還復從雲南王入緬總兵三千屯鎮驃國設方畧招徠其黨由是復業者衆後入覲世祖慰勞之詢以緬國始末擢正議大夫僉緬中行中書省事佩金符頒詔于緬宣布威德緬王稽顙稱謝遣世子信合八的人貢遷通奉大夫雲南諸路行中書省參知政事進資善大夫雲南諸路行中書省左丞大德四年以疾卒

暗伯

暗伯唐人祖僧吉陀迎太祖于不倫荅兒哈納之地大祖嘉其效順命爲禿魯哈必閣赤兼怯里馬赤父禿



兒赤襲職事憲宗累官至文州禮店元帥府達魯花赤  
暗伯弱冠入宿衛性嚴重剛果有大志嘗親迎于燉煌  
阻兵不得歸乃客居於于闐宗王阿魯忽之所世祖遣  
薛徹干等使阿魯忽以通好阿魯忽留使者數年弗遣  
暗伯悉以已馬駝厚贖之令逃去薛徹干等得脫歸具  
以白世祖世祖稱嘆久之既而命元帥不花帖木兒等  
征于闐暗伯乘間至行營見薛徹干於帳中薛徹干曰  
公之忠義已上聞矣不花帖木兒遂承制命暗伯權充  
樞密院客省使俄有旨護送暗伯妻子來京師未幾宗  
王乃顏叛世祖親征暗伯在行間屢捷命爲克流速不  
魯合不周兀等處萬戶又諸王哈魯駙馬忒綿答兒等  
擊暗伯率所部兵戰于克流速石巴禿之地身中七創  
所乘馬亦中二矢自旦至晡鏖戰愈力刺忒綿答兒殺  
之生擒哈魯以獻世祖嘉其功命長唐兀衛兼僉樞密  
院事凡分立諸色五衛軍職襲替屯戍之法多所更定  
歷同僉副樞同知至知樞密院事以疾終于位贈推忠  
保節功臣資善大夫甘肅等處行中書省右丞上護軍  
寧夏郡公諡忠遂子阿乞刺知樞密院事亦憐真班湖  
廣省左丞

也速解兒



也速解兒康里人父愛伯伯牙兀太祖時率衆來歸初以五十戶從軍南征力戰而死也速解兒世其官從丞相伯顏經畧襄樊攻百丈山鶴子灘功居最及襄樊圍合卽被甲先登賞銀鈔百兩明年破復州殺其將以功陞百戶主帥言賞不足酌其勞世祖賜金符加爲千戶督五路招討至元十六年改金虎符管軍總管江南平錄功進懷遠大將軍管軍萬戶領江淮戰艦數百艘東征日本全軍而還有旨特賜養老一百戶衣服弓矢鞍轡有加二十二年移鎮泰州時籍民丁爲兵得萬人以也速解兒爲欽察親軍指揮使統之大德三年以疾卒

子七人曰教化的曰黑斯襲父職以疾卒曰黑的牧馬同知曰延壽襲兄職曰拜顏領哈刺赤曰完澤帖木兒廣德路萬戶達魯花赤曰哈刺章

昔都兒

昔都兒欽察氏父禿孫隸蒙古軍籍中統二年從丞相伯顏討李壇叛以功授百戶至元十年告老以昔都兒代之十一年昔都兒從大軍南征攻取襄陽唐鄧申裕鈞許等州累功授忠顯校尉管軍總把賜銀符將其父軍十四年從諸王伯木兒追擊折兒凹台岳不思兒等於黑城哈刺火林之地平之十七年賜金符陞武畧將



軍侍衛軍百戶時亡宋猶有未附城邑昔都兒言于省願自舉兵下之省從其請諸城聞風而附二十四年賜虎符進宣武將軍漢洞右江萬戶府達魯花赤是年秋七月領洞軍從鎮南王征交趾冬十月至其境駐兵萬劫左丞阿八命進兵拔其一字城射交人奪其戰艦七明年春正月大兵進逼偽興道王居與交人戰于塔兒山奮戈撞擊之右臂中毒矢流血盈掬灑血奮戰射死交人二十餘仍督諸軍乘勝繼進大敗之遂入其都城四月戰于韓村堡擒其將黃澤是夜二鼓交人突至謀劫營官軍堅壁以待敵失計詰旦鳴鼓出營交人却追

殺甚衆還營立木柵增邏卒交人不敢犯五月鎮南王引兵還以昔都兒爲前軍行次陷泥關戰數十合交人却遂還迎鎮南王于女兒關交人四萬餘截其要道時我軍乏食且疲于戰將佐相顧失色昔都兒率勇士奮戈衝擊之交人却二十餘里遂得全師而還鎮南王閱其勞命樞密臣奏陞其秩二十六年賜虎符授廣威將軍砲手軍匠萬戶府達魯花赤大德二年卒子也先帖木兒襲



元史卷一百三十三 列傳 十一

列傳卷第一百三十三

進夫

元史卷一百三十四

列傳第二十一

皇明翰林學士中大夫知制誥兼脩國史 臣宋濂

翰林待制學士直學士知制誥兼國史院編脩管臣王禕等奉勅脩

撒吉思

撒吉思回鶻人其國阿大都督多和思之次子也初為太祖弟幹真必闡赤領王傳幹真薨長子只不干蚤世嫡孫塔察兒幼庶兄脫迭狂恣欲廢嫡自立撒吉思與火魯和孫馳白皇后乃授塔察兒以皇太弟寶襲爵為

元史卷一百三十四 列傳 十一



王撒吉思以功與火魯和孫分治黑山以南撒吉思理之其北火魯和孫理之從憲宗攻釣魚山建言乘勢定江南帝嘉納焉憲宗崩阿里不哥爭立諸王多附之者撒吉思馳見塔察兒力言宜協心推戴世祖塔察兒從之及世祖即位聞撒吉思所言授北京宣撫賜宮人甕吉刺氏及金帛章服及至鎮鋤奸抑疆遼東以寧會高麗有異志帝遣使究治則委罪于其臣洪察忽械送京師道遼東撒吉思訪知洪察忽以直諫恣意即奏疏爲直其事帝命釋之李壇叛命撒吉思帥師從宗王哈必赤討之李壇伏誅哈必赤欲屠城撒吉思力爭曰王者之師誅止元惡脅從罔治因撫摩其人衆情大悅授山東行省都督遷經畧統軍二使兼益都路達魯花赤辭不拜上言山東重鎮宜選貴戚臨之帝不許賜京城宅一區益都田千頃及壇馬羣園林水磴海青銀鼠裘之屬兵後民乏牛具爲之上聞驗民丁力官給之統軍抄不花田遊無度害稼病民元帥野速答爾據民田爲牧地撒吉思隨事表聞有旨杖抄不花一百令野速答爾還其田壇故將毛璋欲率諸部謀執撒吉思以歸宋璋黨上變乃襲璋斬之撒吉思嘗慕古人舉親舉讎之義叛帥故卒得與子姓參用公論多之山東歲屢歉爲請



于朝發粟賑卹又奏蠲其田租山東人刻石頌德卒年六十六後贈安邊經遠宣惠功臣諡襄惠

月乃合

月乃合字正卿其先屬雍古部徙居臨洮之狄道金畧地盡室遷遼東曾祖帖木爾越哥仕金爲馬步軍指揮使官名有馬因以馬爲氏祖把掃馬野禮屬徙靜州之天山以財雄邊宣宗遷汴父昔里吉思辟尚書省譯史試開封判官改鳳翔府兵馬判官死國事贈輔國上將軍恒州刺史廟號褒忠月乃合好學負氣父死時年方十七奮然投冠于地曰吾父死國難吾獨不能紓家難乎

會國兵破汴侍母北行艱關鋒鏑中比見憲宗辭春端謹帝嘉賞之命贊卜只兒斷事官事以燕故城爲治所月乃合慨然以治道自任政事脩舉歲壬子料民丁于中原凡業儒者試通一經卽不同編戶著爲令甲儒人免丁者是月乃合始之也性好施予嘗建言立常平倉舉海內賢士楊春卿張孝純輩分布諸郡號稱得人又羅致名士敬鼎臣授業館下薦引馬文玉牛應之輩爲參佐後皆位至卿相歲己未世祖以親王南征從行至汴令專饋饟運濟南鹽百萬斤以給公私之費所遺州郡汴蔡汝潁之間商農安業軍政脩舉月乃合與有力



馬及即位降詔褒獎世祖將親征阿里不哥月乃合出私財市馬五百以助軍帝厚贍其家曰當償汝也拜禮部尚書佩金虎符四年南邊不靖月乃合建言光穎等處立權場歲可得鐵一百三萬七千餘斤鑄農器二十萬事用易粟四萬石輸官不惟官民兩便因可以鎮服南方詔以本職兼領已括戶三千興煽鐵冶蒙古漢軍並聽節制未行以疾卒年四十八贈推忠宣力翊運功臣正議大夫僉書樞密院事上輕車都尉梁郡侯諡忠懿子孫登仕籍者甚衆至仁宗朝詔行科舉曾孫祖常博學能文章鄉試會試皆爲舉首由翰林應奉拜監祭御史直言忤上官意去居浮光數年起爲翰林待制累遷御史中丞卒諡文貞

### 昔班

昔班畏吾人也父闕里別幹赤身長八尺智勇過人聞太祖北征領兵來歸從征回回國數立功將重賞之自請爲本國坤間城達魯花赤從之仍賜種田戶二百卒昔班事世祖潛邸命長必闌赤中統元年以爲真定路達魯花赤改戶部尚書宗正府札魯花赤阿里不哥之叛帝命昔班詣河西督糧運給軍還至西京北聞萬戶阿矢鐵木兒等方選士卒將從阿里不哥昔班矯制召



其軍赴行在阿失鐵木兒狐疑未決昔班委曲諭之且曰皇帝兄也阿里不哥弟也從兄順事也又何疑焉阿失鐵木兒等請夜議之期以翌日復命且以兵圍昔班以待明日皆至曰從爾之言矣即便宜以西京錢糧給其軍遂率之以行人見帝嘆曰戰陣之間得一夫之助猶爲有濟昔班以二萬軍至其功豈少哉海都叛世祖大閱兵將討之先命昔班使海都使之罷兵置驛來朝昔班至海都傳旨諭之海都聽命既退軍置驛而丞相安童軍先已克火和大王部曲盡獲其輜重海都懼將逃謂昔班曰我不難於殺汝念我父嘗受書於汝姑遣

汝歸以安童之事聞非我罪也昔班以聞帝曰汝言是也先是來者亦嘗有此言尋命爲中書右丞商議政事妻以宗王之女不魯真公主明年復使海都諭之來歸且曰苟不從我爾能敵諸王蕃衛之兵乎海都辭以畏死不敢昔班奉使奔走三年風沙翳目時年已七十矣命爲翰林承旨給全俸養老年八十九而卒子幹羅思密至元二十三年授浙東宣慰使浙東盜起僞鑄印璽僭稱天降大王幹羅思密討平之移鎮廣西峒蠻羅天佑作亂招諭降之年六十九卒子咬住至大三年授典用監卿有盜竊世祖御帶者懸賞五千錠以購賊咬住



擒獲之盜伏誅咬住辭賞武宗嘉其不伐予之千錠官  
至榮祿大夫宗正府札魯火赤

### 鐵連

鐵連乃蠻人也居絳州祖伯不花爲宗王拔都王傳鐵  
連魁偉寡言有謀畧早歲宿衛王府拔都分地平陽以  
鐵連監隰州中統初調平陽馬步站達魯花赤至元初  
宗王海都叛廷議欲伐之世祖曰朕以宗室之情惟當  
懷之以德其擇謹密足任大事者往使焉左右以鐵連  
對遂召見語及大事鐵連應對稱旨帝嘉其辯慧曰此  
事非汝不可然必先詣拔都蒙哥鐵木王所相與計事

而後行使二人副之鐵連既奉命欲直造海都境視其  
虛實然後議于諸王副者弗從曰上命我輩先議于王  
今遽造敵境不可鐵連曰親承密旨汝輩違則當誅副  
者懼而從之行既至海都日召宗親宴飲將伺其隙謀  
害之鐵連乃厲聲斥之曰且食勿語望語言脫口相撫  
爲罪耶良久海都曰直哉酒半鐵連求衣爲歡海都嘉  
其雄辯將解與之其妃止之以皮服二襲付之因語其  
屬曰爲使者當如是矣厚贈以行既至拔都蒙哥鐵木  
王所具告以故王曰祖宗有訓叛者人得誅之如通好  
不從奉師以行天罰我卽外應掩襲勦絕不難矣鐵連



還悉以事聞因言於帝曰海都兵繁而銳不宜速戰來則堅壘待之去則勿追自守既固則無虞矣帝深然之勅所受海都衣服全飾以金凡朝會宜服以表示焉其賞賜不可勝計後屢使拔都王所道遇海都游兵副者前行失對遇害鐵連後至曰我爲天子使可以非禮犯之耶游兵語屈乃曰前者僞使此真使也釋之遂獨得還帝嘗謂侍臣曰有鐵連則朕之宗族將不失和矣海都覘伺拔都王爲備已嚴意乃帖然鐵連始終凡四往返歷十四年帝謂鐵連曰在朝官之要重者惟汝所擇對曰臣志在王室其事未辦不敢奉命今臣母在絳州

老且病得侍朝夕幸也詔從其請授絳州達魯花赤至元十五年平陽李二謀亂鐵連捕問盡得其狀中書奏進其秩帝曰鐵連豈惟能辦此耶加宣武將軍至元十八年病卒於官年六十四子荅刺帶嗣官信武將軍同知大同路總管府事

### 愛薛

愛薛西域弗林人通西域諸部語工星曆醫藥初事定宗直言敢諫時世祖在藩邸器之中統四年命掌西域星曆醫藥二司事後改廣惠司仍命領之世祖嘗詔都城大作佛事集教坊妓樂及儀仗以迎導愛薛奏曰高



麗新附山東初定江南未下天下疲弊此無益之費甚  
無謂也帝嘉納之至元五年從獵保定日且久乃從容  
于帝前語供給之民曰得無妨爾耕乎帝爲罷獵至元  
十三年丞相伯顏平江南還姦臣以飛語讒之愛薛卯  
頭諫得解尋奏詔使西北宗王阿魯渾所既還拜平章  
政事固辭擢秘書監領崇福使遷翰林學士承旨兼脩  
國史大德元年授平章政事八年京師地震上弗豫中  
宮召問灾異殆下民所致耶對曰天地示警民何與焉  
成宗崩內旨索星曆秘文愛薛厲色拒之仁宗時封秦  
國公卒追封太師開府儀同三司上柱國拂林忠獻王

子五人也里牙秦國公崇福使腆合翰林學士承旨  
斯光祿卿闊里吉思同知泉府院事魯合廣惠司提舉

闊闊

闊闊字子清本蔑里吉氏部族世居不里罕哈里敦之  
地其俗驍勇善騎射諸族頗憚之國初舉族內附世祖  
居潛邸選闊闊爲近侍歲甲辰世祖聞王鶚賢避兵居  
保州遣使徵至問以治道命闊闊與廉希憲皆師事之  
既而闊闊出使于外迨還而鶚已行思慕號泣不食者  
累日世祖聞而異之歲庚戌憲宗復召鶚至和林仍命  
闊闊從之游每旦起盛飾其冠服鶚讓之曰聖王好賢



樂善徵天下士命若從學若等不能稱主上心惟誇衒  
鮮華以益驕貴之氣恐窒于外而塞于中道義之言無  
自而入吾所不取也闊闊深自悔悟明日俱純素以進  
鶚乃悅歲壬子奉命僉諸路軍籍以丁壯產多者克之  
所至編籍無撓人皆德之及還帝悅命領燕京匠局世  
祖卽位特授中書左丞未幾遷大名路宣撫使以疾卒  
年四十子堅童字永叔少孤甫十歲卽從王鶚游旣長  
奉命入國學復從許衡游弱冠入侍禁廷授中順大夫  
侍儀奉御遷中議大夫同脩起居注及奉使濟南見  
桓賢遂力薦之至元二十三年授嘉議大夫禮部尚書

遷吏部尚書秩未滿特授通議大夫御史臺侍御史二  
十四年扈從東征屢戰有功遷燕南河北道提刑按察  
使二十八年授正議大夫燕南河北道肅政廉訪使遂  
拜河南行省平章政事驛召赴闕未拜以疾卒年三十  
九

秃忽魯

秃忽魯字親臣康里亦納之孫亞禮達石第九子也自  
幼入侍世祖命與也先鐵木兒不忽木從許衡學帝一  
日問其所學秃忽魯與不忽木對曰三代治平之法也  
帝喜曰康秀才朕初使汝往學不意汝卽知此除蒙古



學士奉議大夫客省使進兵部郎中遷僉太史院嘗宴見世祖屢開說古今治亂政要多所裨益至元二十年遷中書右司郎中未幾大宗正薛徹干薦掌其府判署閱諸獄文案嘗暮歸愀然若有求而未獲者家人問之曰今日所議死案也於我心有疑欲求所以活之未得其方耳他日歸喜曰我得之矣於法當流徙邊地遷吏部尚書時哈刺哈孫爲湖廣平章嘗與禿忽魯同在大宗正素知其賢舉以自輔遂授資德大夫湖廣右丞時湖南北盜賊乘舟縱橫劫掠哈刺哈孫患之禿忽魯曰樹茂鳥集樹伐則散戮一人足矣盜首喬大使者居九

江郡守曳刺馬丹取賂蔽之遣使擒以來獄成殺而令諸市群盜頓息湖南宣慰張國紀劄徵夏稅民弗堪禿忽魯屢請罷之至元二十九年辰州蠻叛副樞劉國傑僉院唆木蘭往討之不利移文索辰澧沅民間弩士三千哈刺哈孫以民弗習戰強之徒傷吾民弗許禿忽魯曰兵貴訓練乃可用也漢軍不習弩因蠻攻蠻古所利遂與之果以此獲勝成宗即位遷江浙右丞適歲旱方至而甬民心大悅未幾平章不忽木卒帝思之問近侍曰羣臣孰有似不忽木者賀伯顏對曰禿忽魯其人也且先帝所知遂驛召還賜雕鞍弓矢俄遷樞密副使大



德七年卒年四十八贈推忠翊亮佐理功臣榮祿大夫  
江浙等處行中書省平章政事柱國大司徒趙國公諡  
文肅子山僧仕至晉寧路總管

唐仁祖

唐仁祖字壽卿畏兀人祖曰唐古直子孫因以唐爲氏  
初畏兀舉國效順唐古直時年十七給事太祖因屬之  
睿宗曰唐古直可任大事睿宗未及用莊聖皇后擢爲  
札魯火赤父驥豪爽好射獵世祖卽位命驥爲裕宗潛  
邸必閣赤陞達魯花赤仁祖少穎悟父沒母教之讀書  
通諸方語言尤邃音律中統初詔諸貴胄爲質帝親閱

之見仁祖曰是唐古直孫邪聰明無疑也俾習國字至  
元六年中書省選充蒙古掾十六年錄囚平陽平反冤  
滯免死者凡十七人十八年授翰林直學士時中書奏  
真定保定兩路錢穀逋負屢歲不決遣仁祖往閱其牘  
皆中統舊案亟還奏罷之轉工部侍郎除中書右司郎  
中拜參議尚書省事時丞相桑哥秉政威焰方熾仁祖  
論議不回屢忤桑哥人皆危之仁祖自若也遷工部尚  
書桑哥以曹務煩劇特重困之仁祖處之甚安尋出使  
雲中桑哥考工部織課稍緩怒曰誤國家歲用亟遣驛  
騎追還就見桑哥相府中遽命直吏拘往督工且促其



期日違期必致汝于法左右皆爲之懼仁祖退召諸署  
長從容諭之曰丞相怒在我不在爾也汝等勿懼宜力  
加勉衆皆感激晝夜倍其功期未及而辦乃罷已而桑  
哥繫獄有旨命仁祖徃籍其家明日桑哥以左右之援  
得釋衆見駭然目仁祖曰怒虎之威可再犯邪悉踰垣  
以竄仁祖獨不爲之動桑哥竟敗二十八年除翰林學  
士承旨中奉大夫遼陽饑奉旨借近侍速哥左丞忻都  
徃賑忻都欲如戶籍口數大小給之仁祖曰不可昔籍  
之小口今已大矣可借以大口給之忻都曰若要善名  
而陷我于惡邪仁祖笑曰吾一人善惡衆已的知豈至

是而始要名哉我知爲國恤民而已何卹爾言卒以大  
口給之俄除通奉大夫將作院使成宗卽位尊大母元  
妃爲皇太后以仁祖善書特勅書冊文復奉詔督工織  
絲像世祖御容越三年告成大德五年再授翰林學士  
承旨資善大夫知制誥兼脩國史以疾卒年五十三贈  
榮祿大夫平章政事追封洹國公諡文貞子恕初授奉  
訓大夫壽武庫提點至大中遷翰林待制後累遷至亞  
中大夫侍儀使

桑兒赤

桑兒赤字道明西夏寧州人父幹扎實世掌其國史初



元史卷二百三十四 列傳 十一  
守西涼率父老以城降太祖有旨副撒都忽爲中興路  
管民官國兵西征運餉不絕無毫髮私時號曰蒲朝清  
世祖卽位幹扎篲寢疾卒遺奏因高智耀以進請謹名  
爵節財用帝嘉納焉朵兒赤年十五通古注論語孟子  
尚書帝以西夏子弟多俊逸欲試用之召見于香閣帝  
曰朕聞儒者多嘉言朵兒赤奏曰陛下聖明仁智奄有  
四海唯當親君子遠小人爾自古帝王未有不以小人而  
亡者惟陛下察焉帝曰朕于廷臣有慙直忠言未嘗不  
悅而受之違忤者亦未嘗加罪蓋欲養忠直而退諛佞  
也汝言甚合朕意因問欲何仕朵兒赤對曰西夏營田

實占正軍儻有調用則又妨耕作土瘠野曠十未墾一  
南軍屯聚以來子弟蕃息稍衆若以其成丁者別編入  
籍以實屯力則地利多而兵有餘矣請爲其總管以盡  
措畫帝可之乃授中興路新民總管至官錄其子弟之  
壯者墾田塞黃河九口開其三流凡三載賦額增倍就  
轉營田使秩滿入覲帝大悅陞潼川府尹時公府無祿  
田朵兒赤乃以官曠地給民視秩分畝而薄其稅潼川  
仕者有祿自此始未幾臺臣奏爲雲南廉訪副使時雲  
南諸蠻叛僚佐悉稱故而去朵兒赤獨居守又八月省  
臣大懼歸符印欲遁朵兒赤乃白于梁王得檄而後出



遷山南廉訪副使未幾復調雲南廉訪使會行省丞相帖不迭兒貪暴擅誅殺羅織安撫使法花魯丁將置于極刑朵兒赤謂之曰生殺之柄繫于天子汝以方面之臣而專殺意將何爲小民罹法且必審覆况朝廷之臣耶法花魯丁竟獲免尋復其官熨夷與蠻相讐殺時省臣受賄助其報仇乃詐奏蠻叛起兵殺良民朵兒赤奏劾竟廢之年六十二卒于官子仁通爲雲南省理問天曆二年三月雲南諸王與萬戶伯忽等叛仁通率官軍抗之没于陳

和尚

和尚玉耳別里伯牙吾台氏祖哈刺察兒率所部歸太祖父忽都思齊力過人歲壬辰從睿宗破金大將合達軍於鈞州三峯山以功賜號拔都魯甲午金亡乙未授管軍百戶從攻宋唐鄧穎蔡襄陽郢復信陽光等州屢立戰功辛亥賜名馬文錦白金甲胄弓矢乙卯從攻漢上鐵城寨歿于軍贈竭忠宣力功臣資德大夫中書右丞上護軍沈國公諡武愍和尚襲父職己未從世祖攻鄂州中統三年李壇叛從國兵討之戰老僧口斬獲甚衆陞阿剌罕萬戶府經歷至元五年攻襄陽軍務繁劇贊畫一有方都元帥阿木薦其才可大用十一年從丞



相伯顏渡江與宋軍戰于柳子魯湫新灘沌口伯顏上其功世祖嘉獎不已十三年從平章阿里海牙攻拔岳州取沙市至江陵宋安撫使高達城守拒戰和尚直抵城下諭以禍福達遂開門出降以功陞行省郎中從國兵圍潭州潭守臣李芾堅守攻之三月不下十二年城破芾死諸將利於虜畧欲屠其城和尚宣言曰拒我師者宋將耳其民何罪既受其降卽是吾民殺之何忍且今列城多未附降而殺之是堅其效死之心也左丞崔斌曰郎中言是平章阿里海牙意亦與合遂從之一城之人賴以全活由是湖南諸郡聞風皆下世祖聞之賞

賜加厚改行省斷事官徇地廣西叔日前軍攻破靜江遂兼行宣撫事廣西平授太中大夫常德路達魯花赤以治最聞擢嶺南廣西道提刑按察使時阿里海牙特功頗驕恣和尚劾奏不少貸遷江南浙西道提刑按察使浙西宋故都民衆事繁在職惟務鎮靜人服其知大體卒於官年四十九贈宣忠守正功臣銀青榮祿大夫司徒上柱國追封沈國公諡莊肅子千奴千奴以御史大夫月魯那延薦入見大安閣世祖念其功臣子卽以其父官授之拜武德將軍江南浙西道提刑按察使時江浙行中書省行御史臺皆治杭千奴上言行省專控江



浙在杭爲宜行臺總鎮江南不宜偏在杭且兩大府並立勢偏則事窒情通則威褻蓋移行臺於要便之所後數年遂移行臺於江東遷山南湖北道提刑按察使二十六年加明威將軍遷淮西江北道提刑按察使時桑哥秉政擅權勢焰熏灼人莫敢言千奴乘間入朝見帝於柳林極陳其罪狀帝爲之改容未幾桑哥伏誅又上言其黨猶布中外宜早處分改立肅政廉訪司進廣威將軍授江北淮東道肅政廉訪使二十一年遷江東建康道肅政廉訪使丁祖母憂服闋東平大名諸路有諸王牧馬草地與民田相間互相侵冒有司視強弱爲予

奪連歲爭訟不能定乃命起千奴治之其訟遂息大德二年授大中大夫建康路總管未行奉詔使淮東西問民疾苦察官吏能否千奴勤於咨訪興利除害還奏軍民便宜三十事多見採用歷江西湖東江南湖北兩道廉訪使時中書平章伯顏等固位日久黨與衆盛所任之人徇情弄法綱紀漸壞千奴撫其實上千憲臺以聞伯顏等皆被黜前後七持憲節剛正不撓聞朝廷事有不便必上章極論未嘗以內外爲嫌七年授嘉議大夫大都路總管兼大興府尹馭吏治民有方以暇日正街衢表里巷國學興工尤盡其力俄進通議大夫同僉樞



密院事上疏言蒙古軍在山東河南者往戍甘肅跋涉  
萬里裝橐鞍馬之資皆其自辦每行必鬻田產甚則賣  
妻子戍者未歸代者當發前後相仍困苦日甚今邊陲  
無事而虛殫兵力誠爲非計請以近甘肅之兵戍之而  
山東河南前戍者官爲出錢贖其田產妻子庶使少有  
瘳也詔從之未幾遷叅議中書省事贊決機務精練明  
敏凡干祿之人由他道進者一切不用時論翕然稱焉  
成宗崩迎仁宗于潛邸奉武宗卽位危疑之際彌綸補  
益之功爲多拜榮祿大夫平章政事商議樞密院事左  
翼萬戶府達魯花赤提調屯田事賜玉帶延祐五年乞

致仕帝憫其衰老從其請仍給半俸終其身退居濮上  
築先聖宴居祠堂於歷山之下聚書萬卷延名師教其  
鄉里子弟出私田百畝以給養之有司以聞賜額歷山  
書院家居七年而卒年七十一贈推忠輔治功臣光祿  
大夫河南江北等處行中書省平章政事上柱國追封  
衛國公諡景憲子龍寶監察御史壽童洪澤屯萬戶早  
卒不蘭奚南臺御史觀音保護洪澤屯萬戶字顏忽都  
起進士知鄭州以治行第一入爲翰林國史院經歷

劉容

劉容字仲寬其先西寧青海人高祖阿華西夏主尚食



西夏平徙西寧民於雲京容父海川在徙中後遂爲雲  
京人容幼穎悟稍長喜讀書其俗素尚武容亦善騎射  
然弗之好也中統初以國師薦入侍皇太子於東宮命  
專掌庫藏每退直卽詣國子祭酒許衡衡亦與進之至  
元七年世祖駐驛鎮海聞容知吏事召至命權中書省  
掾事畢復前職以忠直稱十五年奉旨使江西撫慰新  
附之民或勸其頗受送遺歸賂權貴人可立致榮寵容  
曰剝民以自利吾心何安使還惟載書籍數車獻之皇  
太子忌嫉者從而讒之由是稍踈容然容亦終不辯會  
立詹事院容上言曰太子天下本苟不得端人正士左

右之使之使傾邪側媚之徒進必有損令德聞者是之  
俄命爲太子司議改祕書監未幾出爲廣平路總管富  
民有同姓爭財產者訟連年不決容至取籍考二人父  
祖名字得其實立斷之爭者遂服皇子雲南王至汴其  
達魯花赤某欲厚餼以通賄於王容請自往乃減其費  
後以疾卒於官年五十二

迦魯納荅思

迦魯納荅思畏吾兒人通天竺教及諸國語翰林學士  
承旨安藏扎牙荅思薦於世祖召入朝命與國師講法  
國師西番人言語不通帝因命迦魯納荅思從國師



習其法及言與字暮年皆通以畏吾字譯西天西番經  
 論既成進其書帝命鈐板賜諸王大臣西南小國星哈  
 刺的威二十餘種來朝迦魯納荅思於帝前敷奏其表  
 章諸國驚服朝議興兵討暹國羅斛馬八兒俱藍蘇木  
 都刺諸國迦魯納荅思奏此皆最爾之國縱得之何益  
 興兵徒殘民命莫若遣使諭以禍福不服而攻未晚也  
 帝納其言命岳刺也奴帖滅等往使降者二十餘國至  
 元二十四年丞相桑哥奏為翰林學士帝曰迦魯納荅  
 思之官非汝所當奏也既而擢翰林學士承旨中奉大  
 夫遣侍成宗於潛邸且俾以節飲致戒成宗即位思其

忠遷榮祿大夫大司徒憐其老命乘車入殿仁宗即位  
 廷議汰冗官獨迦魯納荅思為司徒如故仍加開府儀  
 同三司賜玉鞍一是年八月卒

闞里吉思

闞里吉思蒙古按赤歹氏魯祖八思不花從攻乃蠻欽  
 察兀羅思馬札兒回回諸國常為先鋒破敵太祖嘉之  
 賜以虎符及諭降豐州雲州擢充宣撫使祖忽押忽辛  
 襲織佩虎符憲宗嘗語之曰汝所佩金符舊矣何以旌  
 世功命改製以賜之中統三年改河中府達魯花赤卒  
 父藥失謀擢襄陽統軍司經歷改宿州達魯花赤皆不



元史卷之三十四 列傳 十九  
拜樞密副使字羅御史中丞木八刺引見世祖奏曰此  
忽押忽辛子也乞以其祖父虎符授之擢中順大夫金  
剛臺達魯花赤繼改光州屢遷安東州河中府及溫州  
潞州以建康路達魯花赤致仕闊里吉思初以宿衛充  
博兒赤至元二十五年擢朝列大夫司農少卿賜金束  
帶遷中議大夫司農卿陞資善大夫司農卿拜榮祿大  
夫行湖廣平章將兵討海南生黎諸峒寨又明年平之  
師還徵入見賜玉束帶金銀幣帛弓矢甲冑及寶鈔鞍  
勒得旨還鎮成宗即位入見賜海東青鶻白鶻各一及  
衣服有差大德二年改福建行省平章未幾以福建隸

江浙改福建道宣慰使都元帥陞征東省平章政事高  
麗刑政無節官冗民稀闕里吉思因悉加裁正以聞有  
旨徵入見俾條析便民事宜大德五年復拜湖廣平章  
踰年改陝西以目疾還京師加官至金紫光祿大夫雲  
南諸路行中書省左丞相卒年六十六子完澤湖廣右  
丞征廣西賊卒於軍

小雲石脫忽憐 八丹附

小雲石脫忽憐畏吾人仕其國為吾魯愛兀赤猶華言  
大臣也太祖時與其父來歸從征回回國還事睿宗於  
潛邸真定睿宗分地以為本路斷事官子八丹事世祖



烏寶兒赤鷹房萬戶從征哈刺張有功賜男女各一人金一錠及銀甕等物征阿里不哥戰於昔門禿日三合殺獲甚衆賜金一錠後以鷹房萬戶從裕宗北征至鎮海你里溫賜銀椅及鈔一萬五千貫命歸守真定未幾命行省揚州八年辭曰臣自幼未嘗去陛下願留侍左右改隆興府達魯花赤遙授中書右丞諭之曰是朕舊所居汝往居之八年又辭帝不允居三年海都叛奉旨從甘麻刺太子往征之師還以功賜金一錠卒贈銀青光祿大夫司徒子阿里鷹房千戶石得安西王相府官德服汝定府達魯花赤阿散甘肅行省平章政事臘真

由會同館使同知通政院有政蹟官至榮祿大夫中書省平章政事兼翰林學士承旨通政院使卒子察乃金紫光祿大夫中書省平章政事察乃子十人老章知樞密院事撒馬篤中書省參知政事

### 幹羅思

幹羅思康里氏曾祖哈失伯要國初款附爲莊聖太后宮牧官祖海都從憲宗征釣魚山歿於陣父明里帖木兒世祖時爲必闡赤後爲太府少監幹羅思至元十九年爲內府必闡赤二十一年拜監察御史遷雲南行省理問領雲南王府事後以忤桑哥被譖籍其家唯金玉



元史卷三十四 及有 三十一  
帶各一黃金五十兩皆上所賜者乃以公用係官孽畜  
加之罪帝曰口腹之事其寢之二十六年置八番羅甸宣  
慰司進嘉議大夫宣慰使時諸蠻叛服不常幹羅思平  
之乃立安撫等司以守焉二十八年平楊都要等九月  
進中奉大夫錫虎符明年爲八番順元等處宣慰使都  
元帥賜三珠虎符大德六年授通奉大夫羅羅思宣慰  
使兼管軍萬戶進正奉大夫武宗立召還授資善大夫  
中書左丞領武衛親軍都指揮使大都屯田府事尋進  
榮祿大夫中書右丞兼翰林國史承旨仍領武衛屯田  
屢奉旨賜貲產第宅固辭遷四川行省平章政事至大

二年召還以瘡瘍計病不起皇慶二年卒年五十有大  
贈光祿大夫益國公子博羅普化初直宿衛爲速古兒  
赤至大元年爲翰林侍講學士以父疾歸侍延祐四年  
復入侍爲速古兒赤扎撒孫至治元年爲速古兒赤五  
十人之長兼領皇太后宮寶兒赤二年襲授河南府同知  
子察罕不花領其所掌宿衛天曆元年見文宗於汴入  
直宿衛爲溫都赤拜監察御史繼遷御史臺經歷中書  
右司郎中授中憲大夫隆禧總管府副達魯花赤

朶羅台

朶羅台唐兀氏祖小丑太祖既定西夏括諸色人匠小



丑以業弓進賜名怯延兀蘭命爲怯憐口行營弓匠百  
戶徙居和林卒父塔兒忽台襲職阿里不哥叛塔兒忽  
台從戰於失畝里禿之地死之朶羅台從萬戶也速鱗  
兒玉哇赤等累戰有功授前衛親軍百戶積官昭信校  
尉芍陂屯田千戶所達魯花赤後以疾退朶羅台之弟  
闊闊出亦業弓嘗獻所造弓帝稱善問其父何名闊闊  
出對曰塔兒忽台臣之父也帝見其狀貌魁偉且問其  
能射乎左右對曰能試之果然遂命爲近侍明年武備  
寺臣復以其弓獻且奏用之帝曰孔子言三綱五常人  
能自治而後能治人能齊家而後能治國汝可以此言

論之而後用之俄擢爲大同路廣勝庫達魯花赤廣勝  
者貯兵器之所時總管唐兀海牙以庫作公署寘甲仗  
於虛廩中多被蟲鼠之害闊闊出言於帝復之且責其  
償兵器之旣壞者使者薛綽不花納速魯丁以檄取鷹  
房軍衣甲弓矢若干闊闊出責其入文書領去時憲副  
速魯蠻令毋入文書且命有司封鑰其庫將點視之闊  
闊出不從事聞帝命咎速魯蠻罷之大德元年陞大同  
路武州達魯花赤兼管本州諸軍奧魯勸農事又監建  
州利州改僉四川道廉訪司事拜監察御史累官中大  
夫大寧路總管卒于官朶羅台之子脫歡初直宿衛歷



御史臺譯史拜監察御史遷四川行省左右司員外郎  
四川廉訪司僉事樞密院都事陞斷事官其在四川時  
嘗上疏曰內外脩寺雖支官錢而一椽一瓦皆勞民力  
百姓嗟怨感傷和氣宜且停罷仍減省供佛飯僧之費  
以紓國用如此則上應天心下合民志不求福而福自  
至矣回回戶計多富商大賈宜與軍民一體應役如此  
則賦役均矣爲國以善爲寶凡子女玉帛羽毛齒革玳  
禽奇獸之類皆喪德喪志之具今後回回諸色人等不  
許賣寶中賣以虛國用違者罪而沒之如此則富商大  
賈無所施其奸僞而國用有畜積矣其辭懇直剴切嘗

時稱之

也先不花

也先不花蒙古怯烈氏祖曰昔刺幹忽勒兄弟四人長  
曰脫不花次日怯烈哥季曰哈刺阿忽刺方太祖微時  
怯烈哥已深自結納後兄弟四人皆率部屬來歸太祖  
以舊好遇之特異他族命爲必闡赤長朝會燕饗使居  
上列昔刺幹忽勒早世其子孛魯歡幼事睿宗入宿衛  
憲宗卽位與蒙哥撒兒密贊謀議拜中書右丞相遂專  
國政賜真定之東鹿爲其食邑至元元年以黨附阿里  
不哥論罪伏誅子四人長曰也先不花次日木八刺初



立御史臺爲中丞次日荅失蠻累官至銀青榮祿大夫  
次日不花帖木兒拜榮祿大夫四川省平章政事也先  
不花初世其職爲必闡赤長裕宗封燕王世祖命也先  
不花爲之傳且謂之曰也先不花吾舊臣子孫端方明  
信閑習典故爾每事問之必不使爾爲不善也二十三  
年拜上柱國光祿大夫雲南諸路行中書省平章政事  
時阿郎可馬丁諸種棘夷爲變討平之遂立登雲等路  
府州縣六十餘所得戶二十餘萬官其酋長定其貢稅  
邊境以寧大德二年遷湖廣行省平章爲政不怒而威  
不察而明大事集議衆論不齊徐決一言切中事理咸

出人意表會汴梁行省有妖獄飛語連湖廣平章政事  
劉漢傑右丞燕公楠朝廷驛召二人者入二人與也先  
不花嘗有違言也先不花急遣使附奏明其無他二人皆  
得釋八年遷平章河南行省河決落黎堤勢甚危督有  
司先士卒以備之汴以無患九年進拜上柱國銀青榮  
祿大夫湖廣等處行中書省左丞相賞賜無虛月方面  
以安至大二年卒天曆二年贈推忠守正佐運翊戴功  
臣太師開府儀同三司上柱國恒陽王謚文貞子五人  
曰亦憐真曰禿魯曰荅思曰怯烈曰按攤亦憐真事裕  
宗於東宮爲家令累拜銀青榮祿大夫湖南等處行中



書省左丞相延祐元年卒天曆元年贈推誠輔治宣化  
保德功臣太傅開府儀同三司上柱國追封武昌王諡  
忠定禿魯歷事四朝起家宗正府也可扎魯花赤拜開  
府儀同三司中書右丞相御史大夫太傅錄軍國重事  
薨天曆二年贈懷忠秉義昭宣弼亮功臣太師開府儀  
同三司上柱國追封廣陽王荅思仕至資德大夫湖南  
宣慰使怯烈仕至中政使按攤事成宗襲長宿衛有旨  
給七乘傳使往侍其父也先不花于湖廣諸道憲司以  
按攤孝行聞拜中奉大夫海北海南道宣慰使都元帥  
海康與安南占城諸夷接境海島生黎叛服不常按攤

夙素著夷人帖服生黎王高寺二十餘洞皆願輸貢  
稅在鎮期年以省親辭去至大二年拜資德大夫中書  
右丞行浙東道宣慰使司都元帥未幾奔父喪于武昌  
以哀毀致疾卒天曆二年贈秉義效忠著節佐治功臣  
太保開府儀同三司上柱國追封特進趙國公中書左  
丞相諡貞孝子阿榮由宿衛起家湖南道宣慰副使歷  
拜奎章閣大學士榮祿大夫太禧宗禋院使都典制神  
御殿事



列傳卷第一

列傳卷第一 百三十四

Blank manuscript page with vertical columns and a small mark.



